

## Z A P I S N I K

Sa 36-te redovne sjednice Skupštine Bosansko-podrinjskog kantona Goražde održane 31. maja 2010. godine u sali Skupštine Bosansko-podrinjskog kantona Goražde sa početkom u 10:00 sati.

Sjednici Skupštine Bosansko-podrinjskog kantona Goražde prisustvuje 23 poslanika, i to: poslanici Stranke demokratske akcije: Begović Alija, Đozo Hasan, Mulahmetović Mirsad, Halilović Adis, Ferhatović Jasmin, Obuća Bajro, Agović Adis i Borović Mensud, poslanici Stranke za Bosnu i Hercegovinu: Turčalo Mehmed, Omerbašić Jasmina, Podrug Salko, Žuga Damir, Adžem Memsur, Kumro Mesud i Džemidžić Envera, poslanici Socijaldemokratske partije Bosne i Hercegovine: Bašić Redžo, Mujković Dževida, Frašto Emir, Imamović Ibrahim i Bilić Dragomir, poslanik Bosanskohercegovačke patriotske stranke – Sefer Halilović Terović Dževad, Milović Daliborka, poslanica Stranke radom za boljitak i Tafro Hasan nezavisni poslanik u Skupštini Bosansko-podrinjskog kantona Goražde.

Sa sjednice odsutni: poslanik Stranke za Bosnu i Hercegovinu Rahman Ferid i Kožo Mersudin poslanik Socijaldemokratske partije Bosne i Hercegovine.

Pored poslanika Skupštine Bosansko-podrinjskog kantona Goražde sjednici prisustvuju: Premijer Bosansko-podrinjskog kantona Goražde Uruči Nazif, sekretar Skupštine Bosansko-podrinjskog kantona Goražde Bašić Midhat, sekretar Vlade Bosansko-podrinjskog kantona Goražde Sijerčić Emir, ministri u Vladi Bosansko-podrinjskog kantona Goražde: Pleh Muhidin, Kurtović Mustafa, Imamović Demir, Adžem Dževad i Sipović Nusret, predstavnik Ministarstva za finansije Ratković Nijaz, predstavnici Ministarstva za privredu Hodović Emir i Muratspahić Meho, direktor Kantonalnog stambenog fonda Šunja Ahmed, predstavnici Njemačkog LOT tima, predstavnici OSCE-a, te predstavnici sredstava javnog informisanja.

Skupštinom Bosansko-podrinjskog kantona Goražde predsjedava predsjedavajući Skupštine Alija Begović, a zapisnik vodi Menzilović Džemila.

**Begović Alija** – predsjedavajući Skupštine

Poštovane kolegice i kolege pozivam Vas da na početku današnje sjednice minutom šutnje ili na drugi način u skladu sa svjetonadzorom odamo počast tragično preminulom našem sugradjaninu i ministru g-dinu Vladimiru Nedimoviću.

/Minutom šutnje odata je počast g-dinu Vladimiru Nedimoviću/

Poslovničku intervenciju zatražio je Salko Podrug.

**Podrug Salko** – Obavještavam Vas da od danas 31. 05. 2010. godine ne pripadam poslaničkoj grupi Stranke za Bosnu i Hercegovinu. Želim raditi slobodno, savjesno, samostalno i nezavisno, te vas molim da me od danas tako i prozivate, a u narednom periodu ću odlučiti i o svojoj političkoj orijentaciji.

**Begović Alija** – predsjedavajući Skupštine

Zapisnik sa 34-te redovne sjednice Skupštine ste dobili. Otvaram raspravu. Da li ima primjedbi? Pošto se niko ne javlja za riječ zaključujem raspravu i konstatujem da na zapisnik sa 34-te redovne sjednice Skupštine Bosansko-podrinjskog kantona Goražde nema primjedbi, te da je u skladu sa Poslovnikom Skupštine zapisnik usvojen.

Zapisnik sa 35-te redovne sjednice Skupštine ste dobili. Otvaram raspravu. Da li ima primjedbi? Pošto se niko ne javlja za riječ zaključujem raspravu i konstatujem da na zapisnik sa 35-te

redovne sjednice Skupštine Bosansko-podrinjskog kantona Goražde nema primjedbi, te da je u skladu sa Poslovníkom Skupštine zapisnik usvojen.

/Na sjednicu došao u 10:17 sati poslanik Rahman Ferid/.

/Sjednici prisustvuje 24 poslanika/.

Kolegij Skupštine Bosansko-podrinjskog kantona Goražde za današnju sjednicu predložio je slijedeći:

### **D n e v n i r e d**

- 1/ Vladin sat – poslanička pitanja i inicijative,
- 2/ Nacrt Zakona o izmjenama i dopunama Zakona o zaštiti okoline Bosansko-podrinjskog kantona Goražde,
- 3/ Nacrt Zakona o unutrašnjim poslovima Bosansko-podrinjskog kantona Goražde,
- 4/ Prijedlog Odluke o utvrđivanju prava na zdravstveno osiguranje radnika koji to pravo ne ostvaruju po drugom osnovu za 2010. godinu,
- 5/ Izvještaj o radu Vlade Bosansko-podrinjskog kantona Goražde za 2009. godinu,
- 6/ Izvještaj o izvršenju Budžeta Bosansko-podrinjskog kantona Goražde za 2009. godinu,
- 7/ Izvještaj o utrošenim sredstvima budžetske rezerve za period 01. 01. – 31. 12. 2009. godine,
- 8/ Izvještaj o radu J.U. Služba za zapošljavanje Bosansko-podrinjskog kantona Goražde za 2009. godinu i Izvještaj o izvršenju finansijskog plana J.U. služba za zapošljavanje Bosansko-podrinjskog kantona Goražde za 2009. godinu,
- 9/ Izvještaj o radu J.U. Zavod zdravstvenog osiguranja Bosansko-podrinjskog kantona Goražde i Izvještaj o izvršenju Finansijskog plana J.U. Zavod zdravstvenog osiguranja Bosansko-podrinjskog kantona Goražde za 2009. godinu,
- 10/ Godišnji operativni i finansijski Izvještaj o radu J.U. “Dom za stara i iznemogla lica” Goražde za 2009. godinu,
- 11/ Godišnji operativni i finansijski Izvještaj J.Z.U. Kantonalna bolnica Goražde za 2009. godinu,
- 12/ Izvještaj o radu i finansijskom poslovanju J.U. Zavod za javno zdravstvo Bosansko-podrinjskog kantona Goražde za 2009. godinu,
- 13/ Informacija o radu Nezavisnog odbora za izbor i reviziju policijskog komesara Ministarstva unutrašnjih poslova Bosansko-podrinjskog kantona Goražde za period 01. 01. – 31. 12. 2009. godine,
- 14/ Informacija o aktivnostima na izgradnji obilaznice oko Goražda,
- 15/ Informacija o zimskom i ljetnom održavanju puteva na području Bosansko-podrinjskog kantona Goražde,
- 16/ Informacija o provedenim aktivnostima na izgradnji, održavanju, sanaciji i rekonstrukciji regionalnih cesta i mostova na području Bosansko-podrinjskog kantona Goražde.

**Begović Alija** – predsjedavajući Skupštine

Otvaram raspravu po predloženom dnevnom redu. Ko se javlja za riječ?

**Terović Dževad** – Obzirom da su po Programu rada Skupštine Bosansko-podrinjskog kantona Goražde za 2010. godinu predviđeni izvještaji i onih javnih ustanova i preduzeća koji nisu danas na dnevnom redu, zapravo nisu dostavljeni ti izvještaji, da Skupština danas sa dnevnog reda skine tačke: 5., 6., 7., 8., 9., 10., 11. i 12. i da donese zaključak da se organizuje posebna sjednica Skupštine u najkraćem mogućem roku, da se dostave izvještaji koji nisu dostavljeni i da to bude jedna sjednica koja će, isključivo, biti posvećena izvještajima o radu Vlade, izvršenju Budžeta i ostalim koji su predloženi. Čini mi se da ne bi trebali nikoga izostaviti da ne podnese izvještaj ovom

zakonodavnom tijelu, odnosno preko poslanika Skupštine gradjanima Kantona čije smo pare trošili u 2009. godini.

**Obuća Bajro** – Klub poslanika Stranke demokratske akcije podržava prijedlog g-dina Terovića obzirom da u nekim izvještajima, koji su danas na dnevnom redu, ima evidentnih propusta i neuskладjenosti, negdje fale mišljenja resornih ministara itd. Mislim da zakonska procedura nije u potpunosti zadovoljena, a da o metodologiji izrade izvještaja da i ne govorimo i ako smo o tome dosta pričali. Cijenim da smo napravili iskorak u toj oblasti tako da damo priliku i svima onima koji do sada to nisu predložili i da to onda sve zajedno na jednoj sjednici Skupštine to razmatramo u nekom vrlo bliskom narednom periodu, recimo krajem narednog mjeseca. Dajemo podršku da se tačke koje je predložio g-din Terović, skinu s dnevnog reda. Ako nešto danas mora ići sa zakonskog aspekta neka premijer ili neko od ministara to objasni, pa možemo se korigovati.

**Žuga Damir** - G-din Terović je predložio da se s dnevnog reda skinu tačke od 5. do 12.. Vi znate da Skupština Bosansko-podrinjskog kantona Goražde do kraja šestog mjeseca treba usvojiti Izvještaj o izvršenju Budžeta Bosansko-podrinjskog kantona Goražde, što je u skladu sa zakonskim propisima u Federaciji Bosne i Hercegovine. Po mom mišljenju tačke 5., 6. i 7. trebali bi danas razmatrati. Volio bih da obrazloži ministar finansija da li tačke 5., 6. i 7. možemo skinuti s dnevnog reda današnje sjednice Skupštine.

Kada je u pitanju danas predloženi dnevni red, ja u ime Kluba poslanika Stranke za Bosnu i Hercegovinu, želim danas da izrazim nezadovoljstvo predloženim dnevnim redom iz razloga što danas nemamo tačku dnevnog reda „Mljekaru“, a znate za zaključak gdje se Vlada obavezala da ponudi rješenje Skupštini za prvu narednu sjednicu, a evo svaki put pričamo o „Mljekari“ a nikada je ne stavimo na dnevni red. Izgleda da ova Vlada ne može riješiti pitanje „Mljekare“. Takodjer, želim da uputim kritike Kolegiju Skupštine i Vladi zbog neadekvatnog praćenja Programa rada Skupštine i Vlade Kantona. Dinamika rada je slaba. Bojim se da, ono što smo planirali, ćemo realizovati u najmanjoj mjeri od kada radimo i Vlada i Skupština ako nastavimo da radimo ovim tempom. I ja postavljam pitanje šta je sa ostalim izvještajima javnih preduzeća i ustanova čiji je osnivač Kanton? Ne vidim ništa sporno da razmatramo izvještaje koji su danas na dnevnom redu, a naredni put razmatramo ostale izvještaje, uz zaključak da su svi obavezni dostaviti izvještaje i da zadužimo Vladu Bosansko-podrinjskog kantona Goražde da za narednu sjednicu Skupštine pripremi sve ostale izvještaje, odnosno da traži to od javnih preduzeća i javnih ustanova čiji je osnivač Kanton.

Bio je stav jedne od skupštinskih komisija da se tačka 2. Nacrt Zakona o izmjenama i dopunama Zakona o zaštiti okoline Bosansko-podrinjskog kantona Goražde skine s dnevnog reda. Klub poslanika Stranke za Bosnu i Hercegovinu bi podržao ovaj stav, a obrazloženje je dala Komisija.

**Begović Alija** – predsjedavajući Skupštine

Pošto se niko više ne javlja za riječ, zaključujem raspravu po dnevnom redu i stavljam na glasanje prijedlog g-dina Terović Dževada da se tačke 5., 6., 7., 8., 9., 10., 11. i 12. skinu s dnevnog reda današnje sjednice Skupštine, uz zaključak da se traži od svih koji su dužni da podnesu izvještaje Skupštini, svoje izvještaje dostave kako bi smo do kraja mjeseca juna održali sjednicu na kojoj ćemo razmatrati sve izvještaje koji su u našoj nadležnosti.

Ko je za, molim, da digne ruku? /17 poslanika/

Ima li neko protiv? /2 poslanika/

Da li se neko uzdržao od glasanja? /4 poslanika/

Konstatiram da je Skupština Bosansko-podrinjskog kantona Goražde sa 17 glasova „za“, 2 „protiv“ i 4 „uzdržana“ glasa, na prijedlog poslanika g-dina Terović Dževada, skinula s dnevnog reda: Izvještaj o radu Vlade Bosansko-podrinjskog kantona Goražde za 2009. godinu, Izvještaj o izvršenju Budžeta Bosansko-podrinjskog kantona Goražde za 2009. godinu, Izvještaj o utrošenim sredstvima budžetske rezerve za period 01. 01. – 31. 12. 2009. godine, Izvještaj o radu J.U.

Služba za zapošljavanje Bosansko-podrinjskog kantona Goražde za 2009. godinu i Izvještaj o izvršenju finansijskog plana J.U. Služba za zapošljavanje Bosansko-podrinjskog kantona Goražde za 2009. godinu, Izvještaj o radu J.U. Zavod zdravstvenog osiguranja Bosansko-podrinjskog kantona Goražde i Izvještaj o izvršenju Finansijskog plana J.U. Zavod zdravstvenog osiguranja Bosansko-podrinjskog kantona Goražde za 2009. godinu, Godišnji operativni i finansijski Izvještaj o radu J.U. "Dom za stara i iznemogla lica" Goražde za 2009. godinu, Godišnji operativni i finansijski Izvještaj J.Z.U. Kantonalna bolnica Goražde za 2009. godinu i Izvještaj o radu i finansijskom poslovanju J.U. Zavod za javno zdravstvo Bosansko-podrinjskog kantona Goražde za 2009. godinu, i donijela slijedeći:

### **Z a k l j u č a k**

Zadužuje se Vlada Bosansko-podrinjskog kantona Goražde, da u što kraćem roku, Skupštini Bosansko-podrinjskog kantona Goražde dostavi sve izvještaje o radu i finansijskom poslovanju javnih ustanova i preduzeća čiji je osnivač Bosansko-podrinjski kanton Goražde kako bi se razmatrali na sjednici Skupštine Bosansko-podrinjskog kantona Goražde koja će se održati u mjesecu junu 2010. godine.

**Pleh Muhidin** – ministar za finansije u Vladi Bosansko-podrinjskog kantona Goražde

Po članu 73. Zakona o budžetima u Federaciji Bosne i Hercegovine definisano je koje je krajnje vrijeme za dostavu Izvještaja o izvršenju budžeta za prethodnu godinu, Parlamentu, odnosno Skupštini. U konkretnom slučaju definisano je u periodu od 6 mjeseci, zaključno sa 30. 06. Ministarstvo je Izvještaj završilo sa 30. 04. i uputilo ka Vladi, a Vlada ga je uputila ka Skupštini i danas je to bila jedna od tačaka dnevnog reda. Znači, Zakonom su definisani rokovi zaključno sa 30. 06. tekuće godine za prethodnu godinu.

**Begović Alija** – predsjedavajući Skupštine

Ja ću samo kratko odgovoriti g-dinu Damiru Žugi, budući da ste rekli da se sjednice održavaju jednom u dva mjeseca, mislim da smo ispoštovali Poslovnik, pogotovo posljednjih godinu i nešto imamo sjednice svaki mjesec redovno, a čak smo ponekad imali i više sjednica. Ne kažem ni da je previše ni dovoljno, možda trebamo zasjedati i više. Mi, kao Kolegij, čim dobijemo dovoljno materijala da sazovemo sjednicu i sazivamo je.

Pošto se niko više ne javlja za riječ stavljam na izjašnjanje dnevni red uz izmjenu koju smo usvojili.

Ko je za, molim da digne ruku? /17 poslanika/

Ima li neko protiv? /2 poslanika/

Da li se neko uzdržao od glasanja? /4 poslanika/

Konstatiram da je Skupština Bosansko-podrinjskog kantona Goražde sa 17 glasova „za“, 2 „protiv“ i 4 „uzdržana glasa, usvojila slijedeći:

### **D n e v n i r e d**

- 1/ Vladin sat – poslanička pitanja i inicijative,
- 2/ Nacrt Zakona o izmjenama i dopunama Zakona o zaštiti okoline Bosansko-podrinjskog kantona Goražde,
- 3/ Nacrt Zakona o unutrašnjim poslovima Bosansko-podrinjskog kantona Goražde,
- 4/ Prijedlog Odluke o utvrđivanju prava na zdravstveno osiguranje radnika koji to pravo ne ostvaruju po drugom osnovu za 2010. godinu,

5/ Informacija o radu Nezavisnog odbora za izbor i reviziju policijskog komesara Ministarstva unutrašnjih poslova Bosansko-podrinjskog kantona Goražde za period 01. 01. – 31. 12. 2009. godine,

6/ Informacija o aktivnostima na izgradnji obilaznice oko Goražda,

7/ Informacija o zimskom i ljetnom održavanju puteva na području Bosansko-podrinjskog kantona Goražde,

8/ Informacija o provedenim aktivnostima na izgradnji, održavanju, sanaciji i rekonstrukciji regionalnih cesta i mostova na području Bosansko-podrinjskog kantona Goražde.

### **Tačka 1.-**

Prelazimo na 1-vu tačku dnevnog reda: Vladin sat – poslanička pitanja i inicijative.

**Begović Alija** – predsjedavajući Skupštine

Pozivam poslanike koji nisu dobili odgovor na svoje poslaničko pitanje ili inicijativu ili nisu zadovoljni odgovorom.

Ja nisam uspio, a trebao sam dostaviti odgovor g-dinu Kumro Mesudu, dostaviti svoj odgovor budući da je pitanje sveobuhvatno i široko. Potrebno mi je da pregledam zapisnike sa svih sjednica Doma naroda Parlamenta Federacije i da izvadim podatke koliko sam imao diskusija, koliko sam uložio amandmana itd. Zaista se trudim da taj odgovor da uradim korektno, ali uz sve obaveze koje imam nisam uspio do danas i nadam se da ću za slijedeću sjednicu g-dinu Kumru dostaviti odgovor.

**Mulahmetović Mirsad** – Ja nisam dobio odgovor na tri poslanička pitanja. Na poslaničko pitanje postavljeno vezano za srebro i platinu odgovor sam dobio od Ministarstva unutrašnjih poslova BPK-a Goražde, a tužba uposlenika osnovnog i srednjeg obrazovanja gdje imamo informaciju da se mjeri cca 4 miliona KM, odgovor nisam dobio. Šta je urađeno i dokle se došlo, šta je sa tužbama uposlenika? Na pitanje vezano za vodosnadbjevanje sa izvorišta „Starac“, znamo koliko je to važno pitanje, nisam dobio odgovor. Pitam šta je uradila Vlada i šta namjerava ubuduće uraditi oko vodosnadbijevanja? Također, pitanje vezano za Dom za stara i iznemogla lica. Imali smo, čak, i tematsku sjednicu Skupštine, a odgovor na ovo poslaničko pitanje nisam dobio.

**Adžem Dževad** – ministar za boračka pitanja u Vladi Bosansko-podrinjskog kantona Goražde

Ranije je zakazan sastanak sa uposlenicima In-šeh kruga u Vitkovićima. Vi znate za tešku situaciju u kojoj se nalazi to Preduzeće. Vlada je u nekoliko navrata pokušavala da iznadje adekvatno rješenje kako bi ova firma nastavila sa radom. Menadžment te firme je pokrenuo postupak stečaja, odnosno gašenja proizvodnje i nastavka rada u tom preduzeću. Vlada je u nekoliko navrata organizovala sastanke i radne konsultacije sa menadžmentom i direktorom te firme. Zadnji sastanak na inicijativu Ministarstva za boračka pitanja napravljen je u Vladi Kantona uz prisustvo premijera i ministara sa direktorom firme „Fortuna“. „Fortuna“ iz Gračanice je spremna da preuzme određene aktivnosti, odnosno da izvrši prezapošljavanje svih radnika koji se nalaze u In-šeh krugu i, eventualno, novih radnika. Direktor je ponudio da u sastav „Fortune“ sada udje oko 40 uposlenika, a da do kraja godine uposle, eventualno, 70 radnika koji bi bili uposleni u „Fortuni“. S tim u vezi danas je zakazan sastanak sa uposlenima In-šeh kruga i bilo bi neophodno da ja prisustvujem tom sastanku i da vidimo šta to Vlada, odnosno Skupština možemo uraditi da podržimo ovu inicijativu i da ove kapacitete ne ugasimo.

**Begović Alija** – predsjedavajući Skupštine

Mislim da možemo prihvatiti ispriku g-dina Adžema i dopustiti odsustvo. Ukoliko bude pitanja upućenih ministru mi ćemo ih svakako uputiti u pisanoj formi.

**Turčalo Mehmed** – Kada su u pitanju poslanička pitanja i inicijative upućivana od strane Kluba poslanika Stranke za Bosnu i Hercegovinu i mene kao pojedinca, a u zadnje vrijeme i dobrog broja ostalih poslanika, očigledno se ne može biti zadovoljno, jer se iz sjednice u sjednicu ignorišu postavljena pitanja, odnosno pokrenute inicijative i prodje određeno vrijeme, tako da ljudi koji su ta pitanja postavili ili se kasnije više odreknu tako i ne znaju da li je pametno više pitati neke stvari, kao što su: „Mljekara“ o kojoj toliko govorimo o čemu je govorio moj kolega Damir Žuga. Pokušat ću da podsjetim, u posljednjem vrijeme, šta se pričalo oko „Mljekare“, a u zadnjih šest mjeseci, skoro i ne priča. Na 30-toj redovnoj sjednici Skupštine BPK-a Goražde od 17. 11. 2009. godine, 10-ta tačka bila je naslovljena kao: Informacija o preduzetim aktivnostima u vezi rješavanja problema Mljekare „Milgor“ d.o.o. Goražde. Nakon duge rasprave Skupština je donijela zaključak da Vlada formira Ekspertni tim u roku od 45 dana i upozna Skupštinu o realizaciji ovog Zaključka. Od tada do danas je prošlo 200 dana a da niko iz Vlade vezano za Mljekaru nije ponudio ni jednu rečenicu šta se planira uraditi sa ovim privrednim subjektom, da se pokuša riješiti status uposlenika Mljekare, izmire dugovanja prema radnicima farmerima, dobavljačima itd. Kada sam shvatio da Vlada ne želi da se bavi ovim problemom nakon više od četiri mjeseca, tačnije na 34-toj redovnoj sjednici Skupštine od 1. aprila 2010. godine pokrenuo sam i obrazložio poslaničku inicijativu da se organizira jedna sjednica svih onih koji su od formiranja Mljekare do današnjeg dana bili uključeni u njen rad sa predstavnicima Ambasade Kraljevine Holandije. Čak sam naveo i imena onih koji bi se trebali sa holandjanima naći za stolom i da što prije iskažu je li moguće riješiti ovaj gorući problem. To je nešto staro, praktično 6,5 mjeseci.

Dalje, u diskusiji, učestvovali su Turčalo Mehmed predsjednik Kluba poslanika Stranke za Bosnu i Hercegovinu i Obuća Bajro predsjednik Kluba poslanika Stranke demokratske akcije. Turčalo Mehmed replicirao je na diskusiju Obuća Bajra.

**Ferhatović Jasmin** – Radom Vlade i resornim ministrima kojima sam uputio poslanička pitanja ja sam zadovoljan. Imam molbu za premijera i resorne ministre, naime radilo se o uposlenju dva putara na dva putna pravca Prača-Goražde i Prača-Orahovice-Ilovača. Prema informacijama koje ja imam jedan uposlenik bi koštao 8.000 KM, znači za godinu dana njih dvojica 16.000 KM. Pošto je pola godine njih dvojica kada bi sutra počeli raditi koštali bi 8.000 KM i mislim da Vlada ima mogućnosti da nadje ta sredstva i da do kraja ove godine obezbijedi putare kako bi imali te dvije komunikacije uslovne za putovanje, jer je to jedina Opština koja nema asfalt do centra Kantona.

**Agović Adis** – I ja sam pokrenuo inicijativu za upošljavanje putara i ja sam u principu zadovoljan odgovorom. Samo bih uputio apel prema premijeru, Vladi i ministru za privredu da i za putni pravac Mravinjac-Berič-Spahovići kao i Dedova voda-Rešetnica uposle putare.

**Frašto Emir** - Postavio sam pitanje, a nisam dobio odgovor, a tiče se onih 500.000 KM koje je dobila GIRO „Drina“. Smatram da je to pitanje vrlo važno i govori o načinu koji nije u skladu sa Zakonom pa bi dobro bilo da se upoznamo s tim.

**Kumro Mesud** – Na prošloj sjednici Skupštine postavio sam poslaničko pitanje upućeno našim zastupnicima i poslanicima na većim nivoima vlasti da nam odgovore, upoznaju nas sa njihovim aktivnostima u Federalnom i Državnom parlamentu i efektima tih njihovih aktivnosti. Ovom prilikom bi izrazio razumijevanje i u neku ruku zahvalnost g-dinu predsjedavajućem koji je kolikotoliko shvatio i uvažio ovo moje pitanje, a ovom prilikom bi izrazio nezadovoljstvo sa inertnošću ostalih zastupnika i poslanika. Mislim da je ovdje nepotrebno naglašavati o važnosti i odgovornosti njihovog djelovanja na većim nivoima vlasti i o tom kako je javnost i mi poslanici treba kontinuirano upoznavati o njihovom radu. Nadam se da će ovo moje nezadovoljstvo inicirati uvažene kolege na koje se odnosilo ovo pitanje i da će do slijedeće sjednice Skupštine se potruditi i odgovoriti na isto.

Moja poslanička inicijativa, takodjer na prošloj sjednici, odnosila se na Vladu koja je po meni trebala inicirati proglašenje proteklog mjeseca mjeseca čistoće u ovom Kantonu kako bi se organizovale sve relevantne institucije, organizacije i pojedinci u ovom Kantonu da se konačno nešto

uradi, da se provedu akcije koje bi imale praktični i edukativni značaj i ovaj Kanton učinio što čistijim i urednijim.

**Bašić Redžo** – Na pretprošnoj sjednici Skupštine postavio sam pitanje natkrivanja Podhranjenskog potoka obzirom da je on vodotok druge kategorije i do danas nisam dobio adekvatan odgovor.

**Frašto Emir** - Možda nisam razumio poslanika Kumra. Prošli put sam pokušao da odgovorim na njegovo pitanje. Na pretplošnoj sjednici Doma naroda bio je Zakon o podsticaju u poljoprivredi o kom sam malo govorio na Vaš upit, da smo mi uspjeli da djelujemo da minimum koji se bude dijelio po kantonima će biti 3% što je bilo daleko od toga u početku. Dakle, Dom naroda je zahvaljujući našoj inicijativi zajedničkoj, prije svega, predsjedavajućem Kluba naroda Bošnjačkog naroda Aliji Begoviću usvojio da kada se budu dijelili podsticaji minimum je 3%, to znači za sadašnjih 65 miliona KM 3% je otprilike 2 miliona obezbjedeno za Bosansko-podrinjski kanton Goražde.

**Kumro Mensud** – U svakom slučaju sve pohvale što smo čuli od našeg kolege Frašta Emira, samo kako on reče boji se da se ne razumijemo. Ja sam bio jasan u svom poslaničkom pitanju prošli put i bio sam jasan kada sam tražio pismeni odgovor na moje poslaničko pitanje.

**Begović Alija** – predsjedavajući Skupštine

Pozivam poslanike da postavie nova poslanička pitanja i inicijative

**Podrug Salko** – Dokle se došlo sa realizacijom oko uspostave signala RTV Bosansko-podrinjskog kantona Goražde na prostoru Mjesne zajednice Jabuka – Općina Ustikolina.

Naime, nedavno je došlo do izgradnje predajnika Federalne televizije što je značajan pomak jednakopravnosti pristupa informisanju ovih žitelja ali njih interesuje kad će moći da prate i budu informisani o zbivanjima sa prostora Bosansko-podrinjskog kantona Goražde gdje žive i ostvaruju svoju egzistenciju. Da li postoji mogućnost da se nešto dogovori sa FTV-om?

Može mi ministar za privredu i usmeno odgovoriti.

**Obuća Bajro** – Cijeneći ukupnu situaciju u Bosansko-podrinjskom kantonu Goražde i stanje u Budžetu Bosansko-podrinjskog kantona Goražde, a dobili smo na klupe materijal koji se odnosi na Zakon o izmjenama i dopunama Zakona o pripadnosti javnih prihoda koji je u parlamentarnu proceduru u Predstavničkom domu Parlamenta Federacije Bosne i Hercegovine uputio 10. maja 2010. godine poslanik g-din Fehim Pleh. Cijeneći izuzetno značaj ovog Zakona o izmjenama i dopunama Zakona o pripadnosti javnih prihoda u Federaciji Bosne i Hercegovine, odnosno ovo što je predloženo ovim izmjenama i dopunama, što smo mogli pročitati, ja pozivam na jedinstvo u smislu podrške ovom i cijenim da bi danas mi morali i trebali dati jednim zaključkom podršku donošenju i usvajanju ovog Zakona u Parlamentu Federacije Bosne i Hercegovine. To bi bilo, siguran sam, jedno sistemsko ali, istovremeno i zakonito rješenje koje bi nam obezbjedilo da i u 2010. godini, ali i u svim godinama koje dolaze imamo jedan stabilan i siguran sistem finansiranja svega onoga što je Kanton, kao federalna jedinica, dužan sistemski da finansira i da obezbijedi gradjanima Bosansko-podrinjskog kantona Goražde. Cijenim da nam ovdje treba jedna jasna i nedvosmislena podrška ovakvim prijedlozima i rješenjima koja će sigurno obezbijediti da ovaj Kanton ima bolje sutra. Pozivam da danas jednim kratkim zaključkom damo podršku i veću važnost Zakonu o izmjenama i dopunama Zakona koji je predložio g-din Fehim Pleh i da taj Zaključak usvojimo i pošaljemo u Federaciju Bosne i Hercegovine.

**Adžem Memsur** – Na osnovu člana 95., 202. i 203. Poslovnika Skupštine Bosansko-podrinjskog kantona Goražde /“Službene novine Bosansko-podrinjskog kantona Goražde“, broj: 10/08/, postavljam **sljedeće**:

## Poslaničko pitanje

Kako je Vlada Kantona odredila 21-novog volontera sa Službe za zapošljavanje Bosansko-podrinjskog kantona Goražde kada znamo da ih na evidenciji Službe za zapošljavanje Bosansko-podrinjskog kantona Goražde ima više od 50 /pedeset/.

Koji su to bili kriteriji za odabir tih volontera i mjesta gdje će oni volontirati? Nadam se da to nije stranačka ili rodbinska linija i da će se Vlada Kantona potruditi da, u što kraćem roku, obezbijedi finansijska sredstva za volontiranje ostalih sa VSS-om koji se nalaze na Zavodu za zapošljavanje.

Odgovor tražim u pismenoj formi.

**Terović Dževad** – Ja sam se tokom svog mandata u Skupštini zalagao da se poštuje Poslovnik, pa prema tome i član 201. zbog kojeg sam i predložio da se neke tačke skinu s dnevnog reda i da se organizuje jedna posebna sjednica Skupštine. Drugi razlog je i pitanje koje želim postaviti premijeru u ministru finansija, a to je da li je Zakon o internoj reviziji u Bosansko-podrinjskom kantonu Goražde uskladjen sa odredbama Zakona o reviziji budžeta Federacije Bosne i Hercegovine, što je bila obaveza u skladu sa članom 80. pomenutog Zakona. Naime, članom 62. propisano je da budžetski korisnici su obavezni urediti sistem interne kontrole u skladu sa međunarodnim standardima interne kontrole kako bi se osiguralo da izvršavaju aktivnosti u okviru osnovne djelatnosti itd. Članom 63. posljednji pasus, također, je rečeno da su budžetski korisnici dužni organizirati internu reviziju najkasnije u roku od 90 dana od dana stupanja na snagu Pravilnika iz stava 5. ovog člana, a članom 80. istog Zakona je rečeno da svi drugi zakoni iz ove oblasti da će se primjenjivati odredbe ovog Zakona ukoliko nisu u skladu sa njim. Zašto ovo govorim? Danas su trebali biti na dnevnom redu finansijski izvještaji, nemamo niti jednog mišljenja stručnih lica i osoba da li su ti izvještaji podneseni u skladu sa Zakonom i da li su ti iznosi, planovi, programi, mjere i radnje provedene u skladu sa Zakonom itd.

Ja sam na Komisiji za budžet, finansije i administrativna pitanja imao jedno potpuno suprotstavljeno mišljenje sa ministrom finansija vezano za 8,7 miliona KM kredita koji je u Budžetu evidentiran kao grant viših nivoa vlasti, a ja tvrdim da to nije to, da je to ipak kredit Međunarodnog monetarnog fonda i da on treba u poslovnim knjigama da se evidentira na način kako je i doznačeno. Ako je doznačen kao grant neka se evidentira kao grant, a ako je doznačen kao kredit neka se evidentira kao kredit. Ja vjerujem, ako mi u Kantonu nismo dobili do sada određene kamate i troškove da ćemo vrlo brzo dobiti da platimo i da je to još uvijek kredit. Kada to bude odlukom nadležnog organa, a u skladu sa ovim Zakonom koji sam pominjao, i to isključivo zakonodavno tijelo sa nivoa sa koga se donosi, znači, parlamentarna Skupština u oba doma kod nas, nadležno da donese odluku da se to iz kredita promjeni u grant što će biti dobro, a ja sam jednom i predložio da onog ko to donese nama, uz sredstva za zdravstvo za nabavku opreme, ova Skupština nagradi i da mu posebno priznanje.

Odgovor tražim u pismenoj formi.

/Sjednicom predsjedava zamjenica predsjedavajućeg Skupštine Daliborka Milović/

**Bašić Redžo** - Na osnovu člana 95. Poslovnika Skupštine Bosansko-podrinjskog kantona Goražde /"Službene novine Bosansko-podrinjskog kantona Goražde", broj: 10/08/, pokrećem slijedeću:

### Poslaničku inicijativu

Da Vlada Bosansko-podrinjskog kantona Goražde, u što kraćem roku pripremi i donese propise za olakšice koje će stimulisati očuvanje tradicionalnih i starih obrta.

### O b r a z l o ž e n j e



Članom 8. Zakona o obrtu i srodnim djelatnostima koji je objavljen u „Službenim novinama FBiH“, broj: 37/09/ od 3. juna 2009. godine propisano je da ove olakšice donose Vlade kantona.

Sličnu inicijativu sam podnio na 6-toj redovnoj sjednici Skupštine Bosansko-podrinjskog kantona Goražde /29. 09. 2007. godine/, o istoj sam tražio informaciju na 32-goju redovnoj sjednici Skupštine Bosansko-podrinjskog kantona Goražde /26. 01. 2010. godine/, a u međuvremenu su se promijenili i propisi o obrtu tako da se nadam da će Vlada napokon uvažiti ove inicijative i sa deklarativne podrške preći na djela i preduzeti konkretne korake koji će doprinjeti očuvanju tradicionalnih i starih obrta u Bosansko-podrinjskom kantonu Goražde.

Na osnovu člana 95. Poslovnika Skupštine Bosansko-podrinjskog kantona Goražde /“Službene novine Bosansko-podrinjskog kantona Goražde“, broj: 10/08/, pokrećem slijedeću:

### **Poslaničku inicijativu**

Da Ministarstvo za obrazovanje Bosansko-podrinjskog kantona Goražde, u što kraćem roku, izvrši provjeru težine djačkih torbi i preduzme sve potrebne mjere da se zakonski ograniči maksimalna težina torbi na 10% ukupne težine školarca kako bi se spriječilo deformisanje kičmenog stuba kod školske djece.

### **O b r a z l o ž e n j e**

Svaki dan smo svjedoci posmatrati školarce koji se savijaju pod težinom školskih torbi a ovo je posebno izraženo kod najmladnjih djaka.

Zato predlažem da se ovom problemu posveti posebna pažnja i zaštiti zdravlje školske djece.

O preduzetim mjerama predlažem da se izvrši Skupština Bosansko-podrinjskog kantona Goražde.

Ovu aktivnost je Sarajevski kanton proveo putem Pedagoških standarda još početkom 2008. godine.

**Milović Daliborka** - Tražim od Ministarstva za socijalnu politiku, zdravstvo, raseljena lica i izbjeglice, Sektor povratka da mi dostavi:

1/ Plan povratka za 2009. godinu u kojem je precizno definisana aktivnost na polju održivosti povratka u 2009. godini;

2/ Spisak porodica koje su primile pomoć u iznosu od 63.700 KM, u pitanju je 20 porodica za izgradnju štalskog objekta;

3/ Imena šest porodica koje su dobile pomoć u dostizanju minimuma stambenih uvjeta;

4/ Spisak imena za 39 pojedinaca i 7 povratničkih grupa koje su dobile PVC cijevi za rješavanje pitanja vodosnadbijevanja;

5/ Spisak porodica koje su dobile agregate za pomoć u elektrošnadbijevanju.

Odgovor tražim u pisanoj formi.

**Žuga Damir** – Prije nego što pročitam inicijative, takodjer, ću reći da nisam ni ja dobio odgovor na moju inicijativu vezanu za to da svaka porodica u Kantonu ima po jednog zaposlenog i da se napravi socijalna karta iz koje bi se moglo vidjeti koliko imamo takvih porodica.

Takodjer bi se osvrnuo na Zakon o izmjenama i dopunama Zakona o pripadnosti javnih prihoda, jer mislim da je to jako bitno i naravno da bi mi voljeli da to prodje. Ovdje se radi o jednom najvažnijem Zakonu u Federaciji. Ne mogu da vjerujem i neću da vjerujem da poslanik u Federalnom parlamentu nije se konsultovao sa predsjedavajućim domova iz drugih stranaka. Ovo je možda i lična promocija ako je sam predložio. Zasmatalo mi je kada je uvaženi poslanik Obuća rekao

da nije bitno od koga i koji zakon dolazi. Bitno je. Imali smo primjer kada je bio Zakon o komunalnim taksama i vraćen je bez ijednog argumenta, bez ijedne primjedbe i ijednog Amandmana samo iz razloga što ga je neko predložio. Hoću da pitam ministra finansija kako je došlo do povećanja komunalnih taksi u našem Kantonu ako nije prošao Zakon. Ja sam dobijao nekoliko pisama od građana gdje mi se postavljalo to pitanje. Nije mi to jasno.

Na osnovu člana 95., 202. i 203. Poslovnika Skupštine Bosansko-podrinjskog kantona Goražde /"Službene novine Bosansko-podrinjskog kantona Goražde", broj: 10/08/, pokrećem slijedeću:

#### **Poslaničku inicijativu**

Da Vlada Kantona obavezno nastavi i dalje sa projektom Pravnog i Ekonomskog fakulteta Sarajevo, istureno odjeljenje Goražde u školskoj 2010/2011 godini.

Dakle, vrijeme je da odmah Vlada potpiše ugovor o nastavku rada jedne dobre saradnje sa ovim visokoškolskim obrazovnim ustanovama kako bi naši mladi mogli studirati u Goraždu, a ne u Sarajevu, jer ne može svako iz Goražda studirati u Sarajevu. Ovakve projekte treba uvijek pozdraviti. Gore navedene visoko školske ustanove to žele i ja hoću da vjerujem da to želi i Vlada našeg Kantona i ne vjerujem u priče koje kruže gradom da Vlada želi da štedi na ovom i da nema namjeru potpisivati ugovor sa navedenim fakultetima, tj. da misli gasiti taj projekat. Pogotovo ako se uzme u obzir i to da je na prijedlog Kluba Stranke demokratske akcije, Vlada Kantona prihvatila Zaključak o izradi Elaborata o pravdanosti formiranja Univerziteta u Goraždu, a sve sa ciljem poboljšanja obrazovanja u Bosansko-podrinjskom kantonu Goražde. Molim Vladu da pristupi odmah realizaciji gore navedene inicijative kako bi se studenti na vrijeme mogli upisati.

Na osnovu člana 95., 202. i 203. Poslovnika Skupštine Bosansko-podrinjskog kantona Goražde /"Službene novine Bosansko-podrinjskog kantona Goražde", broj: 10/08/, pokrećem slijedeću:

#### **Poslaničku inicijativu**

Da Vlada i Skupština Kantona upute zahtjev menadžmentu FTV i BHTV za postavljanje TV primopredajnika na brdu Lagum i Baba, kako bi svi stanovnici našeg Kantona mogli pratiti javne emitere FTV i BHTV za što i redovno već godinama plaćaju Zakonom predviđenu mjesečnu taksu.

#### **O b r a z l o ž e n j e**

Smatram da je jako nekorektno od onih koji su se kod postavljanja aktuelnih primopredajnika FTV i BHTV u prvobitnoj varijanti, stavili iznad struke i odvucli primopredajnike tamo gdje njima odgovara, kako bi možda imali bolji signal na svojoj vikendici ili u svom rodnom mjestu.

Ono što sam čuo od uposlenih ljudi FTV i BHTV, a sve sa ciljem dobijanja novih primopredajnika jeste da Kanton mora uputiti zahtjev za postavljanjem novih primopredajnika i molim da predsjedavajući Skupštine i Premijer upute zahtjev FTV i BHTV za realizaciju istog.

Da bi ja ovo mogao uputiti, kao predsjedavajući Skupštine, potrebno je da Skupština usvoji takav zaključak. Vjerovatno ćemo se do slijedeće sjednice moći opredjeliti po ovim inicijativama.

**Džemidžić Envera** – Podnijet ću, na osnovu člana 95., 202. i 203. Poslovnika Skupštine Bosansko-podrinjskog kantona Goražde /"Službene novine Bosansko-podrinjskog kantona Goražde", broj: 10/08/, slijedeću:

## Poslaničku inicijativu

Da Vlada Kantona odmah počne sa primjenom Zakona o pripadnosti javnih prihoda u Bosansko-podrinjskom kantonu Goražde i finansiranju Bosansko-podrinjskog kantona Goražde. Realizacija Zakona odnosi se na član 9. tačka 10. tj. da se iz Budžeta Kantona počne sa finansiranjem i Predškolskog obrazovanja.

## O b r a z l o ž e n j e

Smatram da novčana sredstva u mjesečnom iznosu od 3 do 5 hiljada KM koje bismo dali obdaništima ne bismo stvorili problem Budžetu Kantona. Sa druge strane imali bismo i primjenu Zakona na koji se amandmanski djelovalo od strane poslanika i Vlada prihvatila isto. Takođe, želim da kažem da sam protiv bilo kakvog povećanja cijene obdaništa i to se može i treba spriječiti realizacijom ove inicijative što je i zakonska obaveza Kantona od mjeseca marta tekuće godine.

Prije moje slijedeće inicijative, pročitat ću pismo koje sam dobila od građana Mjesne zajednice Goražde IV, preciznije naselja Lozje.

„Skupštini Kantona  
Poštovana gospodo Esellamu allejkum i dobar vam dan!

Preživjeli mještani naselja Podlozje od Srpske agresije na Bosnu i Hercegovinu, a koji žive u Mjesnoj zajednici IV ovog grada, 22. maja obilježavaju dan stradanja svojih najmilijih.

Naime, 22. maja 1992. godine ovdje su Srbi izvršili strašan sločin, ubili su oko 40 ljudi, žena i djece bez ikavog povoda i razloga, samo zato što su bili Muslimani. Naselje su u potpunosti uništili.

Do danas, a prošlo je 18 godina još niko od tih ratnih zločinaca nije procesuiran.

Šta se to čeka, a dovoljno ima valjane dokumentacije, a i preživjelih svjedoka. Možda se čeka da ti zločinci zajedno sa Srbijom optuže nas preživjele što nas nisu pobili. Naše Tužilaštvo je dužno to pokrenuti, a ne znam iz kojih razloga neće to da uradi. Šta reći na ovom skupu mještanima 22. maja, a i Vi ćete biti pozvani, milim prvenstveno na premijera“.

Ovo pismo je poslato 3. maja 2010. godine. Nije bilo skupštinskog zasjedanja, znači, ja tek sada ga čitam i na osnovu člana 95., 202. i 203. Poslovnika Skupštine Bosansko-podrinjskog kantona Goražde /“Službene novine Bosansko-podrinjskog kantona Goražde“, broj: 10/08/, pokrećem slijedeću:

## Poslaničku inicijativu i pitanje

Sekretaru Skupštine i predsjedavajućem, a Vi se odredite kome ćete uputiti: Ministarstvu za pravosuđe, upravu i radne odnose, Ministarstvu unutrašnjih poslova, Tužilaštvu, svima ili nekom četvrtom da u vidu Informacije obavijesti Skupštinu na narednom zasjedanju: Šta je uradjeno po pitanju procesuiranja odgovornih za ovaj ratni zločin?

Tužilac je na lokalnoj televiziji nedavno rekao da su uradjene istražne radnje i da su papiri poslani na Federalni nivo.

Očito da građani nisu zadovoljni ovom Informacijom.

**Kumro Mesud** – Inicijativa moje kolegice Envere me je ponukala da proširim ovu inicijativu i da se podsjetimo moje inicijative na koju ova Skupština nije reagovala, a koja se odnosila na formiranje jednog privremenog skupštinskog tijela koje bi, u okviru svoje nadležnosti, uradilo sve da se ispita kako je to moguće da ni poslije 13 godina nakon završetka rata niko nije osuđen za ono

što se dešavalo na ovim prostorima. Mislim da nije nepotrebno da vas podsjećam šta se sve dešavalo i kakvi su strašni ratni zločini učinjeni nad ovim narodom.

U tom smislu, obzirom da se nije reagovalo na moju inicijativu, predlažem da ova Skupština donese zaključak u vezi s ovim.

Moje poslaničko pitanje upućujem ministru finansija da nam odgovori ko je sebi uzeo za pravo da bez saglasnosti ove Skupštine poveća odobreni iznos kredita za nabavku medicinske opreme po projektu opremanja Kantonalne bolnice Goražde koji je izglasala ova Skupština u iznosu od 3.950.000 eura. Dodatno povećanje u iznosu od 350.000 eura mislim da ne može biti u skladu sa zakonskim propisima koji regulišu ovu oblast. Zamolio bih ministra kada bude odgovarao na ovo pitanje da nas informiše o onome što misli da je aktuelno o sadašnjem stanju našeg Budžeta.

Iskoristit ću priliku i da vas podsjetim na jedan, za sve nas, značajan dan, a to je Svjetski dan borbe protiv pušenja. Da nas sve podsjetim koliko nas pušenje svakodnevno ubija i koliko svakodnevno mladih ljudi, djece postaju svakodnevno pušači. S tim u vezi bih pohvalio aktivnosti Udruženja mladih CIVITAS i izrazio bih zadovoljstvo s onim što je ministar Imamović podržao u svakom smislu njihove aktivnosti, a bilo bi dobro da i mi osmislimo neku podršku ovim aktivnostima. Ako ništa da se u vrijeme pauze pridružimo šetnji koju su organizovali CIVITAS i Udruženje „Biser“.

**Bilić Dragomir** – Pokrećem dvije inicijative:

1/ Predlažem da se na našem Kantonu formira komunalna policija, tako što bi na 5.000 stanovnika dolazio jedan policajac. Oni bi bili upućeni na obuku, imali bi uniformu i sva prava kažnjavanja i ostalog što pripada policiji.

2/ Predlažem da Vlada Bosansko-podrinjskog kantona Goražde izdvoji sredstva za rješavanje problema pasa lualica u našem gradu.

**Borović Mensud** – Na osnovu člana 202. i člana 203. Poslovnika Skupštine Bosansko-podrinjskog kantona Goražde /“Službene novine Bosansko-podrinjskog kantona Goražde“, broj: 10/08/, **p o d n o s i m:**

### **P o s l a n i č k o   p i t a n j e**

Ovih dana se navršava osamanaest godina od izvršenog zločina nad muslimanskim civilnim stanovništvom na području Općine Foča-Ustikolina, koji se desio 1992. godine u vrijeme agresije na RBiH, a kada je po Izvještaju Komisije Općinskog vijeća za utvrđivanje činjenica o stradanju civila na području Opštine Foča-Ustikolina /1992.-1995. godina/ ubijeno oko 200 civila muslimanske nacionalnosti. S tim u vezi, a nakon brojnih bezuspješnih pokušaja porodica žrtava, udruženja i organa vlasti u predhodnom periodu da se ovo pitanje počne rješavati, nakon dvije godine, ponovo postavljam poslaničko pitanje nadležnim tužilaštvima u Bosni i Hercegovini, kada će odgovorni za ove stravične zločine biti procesuirani?

**Agović Adis** – Na jednoj od prethodnih sjednica donijeli smo Odluku o dodjeli i prodaji stanova na području našeg Kantona, odnosno Goražda, pa u skladu sa članom 3. ove Odluke postavljam pitanje prema onim ministarstvima koja su nadležna za ovu oblast, a to su: Ministarstvo za boračka pitanja, Ministarstvo za socijalnu politiku, zdravstvo, raseljena lica i izbjeglice, Ministarstvo za urbanizam, prostorno uređenje i zaštitu okoline i Premijeru dokle se stiglo sa realizacijom ove Odluke, odnosno dokle se stiglo sa izradom Pravilnika za dodjelu i prodaju potkrovnih stanova.

**Turčalo Mehmed** – Na osnovu člana 95., 202. i 203. Poslovnika Skupštine Bosansko-podrinjskog kantona Goražde /“Službene novine Bosansko-podrinjskog kantona Goražde“, broj: 10/08/, pokrećem slijedeću:

## Poslaničku inicijativu

Da Vlada Kantona subvencionira 50% iznosa za pripremu i izgradnju magisterija za postdiplomce koji su bili korisnici stipendija iz ovog Kantona i po stjecanju diploma visoke školske spreme nisu dobili radna mjesta, te su se odlučili na postdiplomski studij!

Molim da mi se odgovor dostavi do naredne sjednice u pisanoj formi.

**Halilović Adis** – Pitanje upućujem Ministarstvu za privredu Bosansko-podrinjskog kantona Goražde.

Općina Foča-Ustikolina tražila je od Vlade Bosansko-podrinjskog kantona Goražde da se lokalitet „Modran“ da na korištenje Općini Foča-Ustikolina s ciljem uredjenja istog i pravljenja sadržaja za razvoj turizma. Dokle se stiglo sa davanjem navedene saglasnosti i zašto je problem da se dodjeli zemljište koje je danas neiskorišteno? Mislim da se može odgovoriti usmeno odmah.

G-din Kumro je pokrenuo pitanje nabavke opreme u Kantonalnoj bolnici Goražde. Želio bih dopuniti njegovo pitanje: Dokle se stiglo sa nabavkom te opreme i zašto se kasni? Po meni utrošeno je puno vremena da se usaglasi plan i spisak neophodne opreme za nabavku.

**Imamović Ibrahim** – Na ovoj sjednici je Klub poslanika Stranke demokratske akcije predložio da podržimo Zaključak našeg poslanika u Federalnom parlamentu za promjenu Zakona o pripadnosti javnih prihoda. Također, postoje određene inicijative pojedinaca i političkih partija da vojska pomogne u izgradnji naših lokalnih puteva. Klub poslanika Socijaldemokratske partije podržava ovaj Zaključak, jer je ovo sve u tonu našeg prijedloga i ideje Deklaracije o ravnopravnosti Bosansko-podrinjskog kantona Goražde u Federaciji Bosne i Hercegovine. Mi smo očekivali od poslanika i svih drugih koji mogu da doprinesu da se tekst te Rezolucije poboljša i da to bude stav ove Skupštine. Ravnopravnost Bosansko-podrinjskog kantona Goražde je mnogo kompleksna stvar. Kada je Bosansko-podrinjski kanton Goražde, odnosno političke partije ovdje kada su se usudile da dadnu nekakvu hijerarhiju Federaciji i Državi onda smo dobro kažnjeni, pa se sada govori da li nam je ovo kredit ili grant, a uvijek je bio grant. Da kažemo ovdje jasno, bez obzira koja će politička opcija u oktobru biti, da se uvijek ne bavimo time, i ova Skupština i bilo koja naredna Vlada, hoće li se neko smilovati da Bosansko-podrinjskom kantonu dadne neke pare ili neće. Upravo to mi podržavamo i Deklaracijom trebamo da podržimo sve druge aktivnosti i sve ono što je malo prije uvaženi kolega doktor rekao o raspodjeli prihoda itd., da znamo tačno koliko se treba izdvajati iz budžeta, tako da ove inicijative koje se vode da angažujemo vojsku i bilo koje druge inicijative trebaju da imaju podršku svih političkih partija, odnosno ove Skupštine neovisno o sastavu Skupštine itd. Mi ćemo na slijedećoj sjednici Skupštine predložiti taj tekst, ali bih ponovo molio da dostavimo to u Stručnu službu Skupštine da možemo da poboljšamo tekst Rezolucije, jer bi ona bila nešto što bi ova Skupština ostavila u amanet budućim skupštinama, da se nje pridržavaju i svim poslanicima na svim nivoima da rade u tom pravcu.

**Kurtović Mustafa** – ministar za privredu u Vladi Bosansko-podrinjskog kantona Goražde

Podržao je diskusiju g-dina Imamović Ibrahima i istakao da treba staviti do znanja svim federalnim i državnim ministarstvima da trebaju poštovati Ustav Bosne i Hercegovine u smislu ravnomyernog razvoja svih deset kantona u Federaciji.

Dao je odgovor na poslaničko pitanje g-dina Podrug Salka i istakao da su već zaduženi ljudi koji rade na obezbjedjenju dijelova koji su potrebni da se ugrade na tom predajniku u Fočanskoj Jabuci kako bi se obezbijedio prijem Kantonalne i Federalne televizije, a da se istovremeno radi i na proširenju predajnika na druga područja gdje je potrebno kako bi omogućili građanima da imaju kvalitetan prijem.

Što se tiče pitanja Halilović Adisa vezano za „Modran“ mi smo odluku predložili Skupštini. Poznato je da je priobalje rijeke Drine javno vodno dobro u vlasništvu Federacije. Bilo je primjedbi na predloženu Odluku i mi ćemo na jednu od narednih sjednica Skupštine ponovo predložiti Odluku o proglašenju javnog vodnog dobra od opšteg interesa za razvoj, prije svega, turizma za područje Bosansko-podrinjskog kantona Goražde.

Na kraju, jedna informacija, sutra će doći ljudi iz državnog Ministarstva odbrane vezano za angažovanje vojske na sanaciji puteva, gdje ćemo razgovarati i dogovarati oko uređenja putnih komunikacija na području Kantona.

**Pleh Muhidin** – ministar za finansije u Vladi Bosansko-podrinjskog kantona Goražde

Kada je u pitanju definisani dug Bosansko-podrinjskog kantona Goražde za 2009. godinu, o čemu je govorio poslanik g-din Dževad Terović, samo da kažem 8.700.000 KM koji je u Budžet BPK-a Goražde za 2009. godinu doznačen sa 31. 12. 2009. godine, ta finansijska sredstva su doznačena preko Budžeta Federacije, te na osnovu obrasca raspodjele pripadnosti prihoda koja su na nivou izvršenja Budžeta isti prihodi se evidentiraju samo u prihodovnoj strani. Objašnjenje je dato na stranici 22. Izvještaja o izvršenju Budžeta, gdje se kaže da je to evidentirano na ekonomskom kodu – Grantovi sa većeg nivoa i finansiranje 10.950.000 KM, od čega, naznačili smo 8.700.000 KM se odnosi na ovo što je gosp. Terović imao primjedbu i mi smo kroz dopunu današnjeg materijala koji smo vam podjelili, vidi se da je povećanje po osnovu duga na strani 61. umjesto 3.800.000 KM, sada je uvećano za 8.700.000 KM, odnosno da je to 12.500.000 KM. Mi smo ovaj iznos 8.700.000 KM iskazali kao dio finansiranja koji smo tražili od Federalnog ministarstva finansija kako da se to definiše i 25.05.2010. godine dobili smo konačan stav, ali mi ćemo u pisanoj formi odgovoriti na pitanje g-dina Terovića.

Kada je u pitanju dilema poslanika g-dina Damira Žuge da mu se obraćao dio građanstva zašto se povećavaju komunalne takse, moram da kažem da su komunalne takse, isključivo, izvorni prihodi lokalnih zajednica. Prema tome nije bilo nikakvih razloga i okolnosti da bilo Vlada ili Ministarstvo utiče na povećanje i daje saglasnost na povećanje. Ponavljam, komunalne takse su isključivi prihodi u nadležnosti lokalnih zajednica.

Bilo je pitanje poslanika g-dina Kumro Mesuda ko je sebi dao za pravo da poveća kreditno zaduženje. Ministarstvo za finansije nema tu informaciju, međutim, Ministarstvo za finansije i ova Skupština je 31. 03. 2009. godine definisali kreditno zaduženje od 3.950.000 eura za drugu fazu opremanja Kantonalne bolnice. Ministarstvo za finansije je 8. 4. 2010. godine dobilo akt od Federalnog ministarstva finansija da je u pitanju „neko kreditno zaduženje“ 4.300.000 eura. Uvažavajući zakonsku osnovu Zakona o Budžetima koji definiše da je isključivo Skupština ta koja donosi odluke o zaduženjima. Prema tome, svi se možemo sjetiti da Odluke o korekciji sa 3.950.000 eura na 4.300.000 eura nije bilo, tako da Ministarstvo za finansije ne može da da bilo kakvu Informaciju koje sebi dao za pravo, kako ste vi to definisali u svom pitanju ovdje, da poveća zaduženje.

Drugi dio pitanja poslanika Kumro Mesuda je bilo kako trenutno funkcioniše Budžet Bosansko-podrinjskog kantona Goražde. Sa 31. 05. 2010. godine punjenje Budžeta je 11.538.000 KM, što će reći da izvršenje Budžeta na prihodovnoj strani imamo 70,65%. Nedostatna finansijska sredstva su u odnosu na usvojeni Budžet sa 31. 12. 2009. godine nepunih 4.800.000 KM i najveći dio tih nedostatnih finansijskih sredstava su posljedica nedoznačavanja, odnosno nedefinisanja tranše sa većeg nivoa. Da vas podsjetim ona je u Budžetu planirana u iznosu od 11.135.000 KM. Znači, izvršenje Budžeta, i ako nije bilo nekih većih terećenja, u odnosu na stvorene obaveze ima svoju prohodnost. Međutim, izvršenje Budžeta, prije svega, prema lokalnim zajednicama sa 31. 05. 2010. godine izvršenje je samo za jedan mjesec. Ministarstvo za finansije shodno Zakonu o budžetima već je završilo Izvještaj o izvršenju za prva tri mjeseca tako da, vjerovatno, kod usvajanja od strane Vlade bit ćete upoznati u formi Izvještaja kao što je zakonska obaveza definisana Zakonom o izvršenju Budžeta za 2010. godinu.

**Obuća Bajro** – Želio bih da dopunim ono što sam u prvom dijelu rekao. Obzirom da sam konsultovao odredbe Poslovnika Skupštine Bosansko-podrinjskog kantona Goražde, sve ono što sam iskazao kroz svoju inicijativu i predložio Zaključak, vidio sam da je primjerenije da se predloži donošenje Deklaracije. Član 110. Poslovnika Skupštine Bosansko-podrinjskog kantona Goražde daje uporište za to. Ja ću ovo pripremiti u toku sjednice i podijeliti svim poslanicima i ostalim zainteresovanim, članovima Vlade itd.

Ja ću pročitati ovaj tekst:

Na osnovu člana 110. Poslovnika Skupštine Bosansko-podrinjskog kantona Goražde /"Službene novine Bosansko-podrinjskog kantona Goražde", broj: 10/08/, Skupština Bosansko-podrinjskog kantona Goražde, na 36-toj redovnoj sjednici održanoj 31. maja 2010. godine, donosi:

### **D e k l a r a c i j u**

Skupština Bosansko-podrinjskog kantona Goražde daje punu podršku i poziva Parlament Federacije Bosne i Hercegovine da usvoji Prijedlog Zakona o izmjenama i dopunama Zakona o pripadnosti javnih prihoda u Federaciji Bosne i Hercegovine koji je upućen u parlamentarnu proceduru 10. maja 2010. godine.

Skupština Bosansko-podrinjskog kantona Goražde posebno poziva poslanike u oba doma Parlamenta Federacije Bosne i Hercegovine sa područja Bosansko-podrinjskog kantona Goražde da prihvate i podrže usvajanje Zakona o izmjenama i dopunama Zakona o pripadnosti javnih prihoda u Federaciji Bosne i Hercegovine.

### **O b r a z l o ž e n j e**

Obzirom da Bosansko-podrinjski kanton Goražde nema potrebnog privrednog razvoja i da ekonomski rast nije samoodrživ bez adekvatne potpore viših nivoa vlasti, smatramo da bi se donošenjem ovog Zakona obezbijedili uslovi da ovaj Kanton ima privredni razvoj i postane samoodrživ.

Na osnovu projekcija i pokazatelja za 2010. godinu, ponudjenim prijedlogom, odnosno koeficijentom od 1,27% obezbjedila bi se dodatna sredstva na godišnjem nivou od cca 28 miliona KM i izvršila proporcionalna raspodjela na ekonomski neodržive kantone.

Bosansko-podrinjskom kantonu Goražde potrebno je obezbijediti najmanje dodatnih 16,8 miliona KM godišnje ili 60% od ubranih sredstava radi pokrivanja budžetskog deficita.

Ovim prijedlogom izmjena i dopuna Zakona prihodi koji pripadaju kantonima vraćaju se na nivo od 51,48%, dok se koeficijent pripadnosti prihoda Federacije Bosne i Hercegovine, takodje, vraća na nivo 36,20% kako je to bilo utvrđeno prije izmjena i dopuna Zakona o pripadnosti javnih prihoda u Federaciji Bosne i Hercegovine /"Službene novine Federacije Bosne i Hercegovine", broj: 43/08/.

Ima još jedna Deklaracija o kojoj je govorio g-din Imamović. Ona je predložena na skupštinskom zasjedanju 1. aprila 2010. godine koja je jako bitna i jako važna, pa bih rekao i jako hitna, ali čini mi se da se nismo još o njoj odredili i izjasnili.

Obzirom da sam ja ovo predložio ispred Kluba poslanika Stranke demokratske akcije mi smo saglasni da sve ovo što smo izrekli bude jedna posebna Deklaracija, to je jedna varijanta, da bude sastavni dio Deklaracije koja je već bila u skupštinskoj proceduri, da se ta Deklaracija dogradi ili da idu i jedna i druga. Zamolio bih da se danas izjasnimo ili o ovoj ili o obje Deklaracije da ne gubimo dodatno vrijeme jer mislim da je jako važno, bitno i hitno da se odredimo već danas. Možemo do kraja sjednice ostaviti otvorenu ovu tačku kako bi i poslanici mogli nešto novo predložiti da se ugradi kako bi Deklaracija bila što kvalitetnija.

**Kumro Mesud** – Ja ne mogu biti zadovoljan odgovorom ministra za finansije. Ja sam poslije ovog odgovora još zabrinutiji. Ne mogu da shvatim kako smo svi ovdje zajedno prihvatili

činjenicu da se ovaj Kanton, pored izvjesnih 20.000.000 KM duga zadužio još sa dodatnih 700.000 KM, pa bih molio nekog iz Vlade, ako ministar finansija nije kompetentan i nije u stanju da odgovori i da svoje primjedbe oko drastičnog kršenja zakonske procedure kod zaduživanja Kantona u iznosima većim od pola miliona KM.

Što se tiče inicijative o kojima su govorili kolege Obuća i Imamovića, zaista je, lijepo to slušati, ali čovjek ne može da povjeruje da poslije 13 godina se tako zdušno krenulo oko pokretanja takvih inicijativa i, što reče moj kolega Damir, da je teško vjerovati da će tako olako ta procedura na većim nivoima vlasti proći.

**Žuga Damir** – Ja želim da pomognem u vezi ovoga što je predložio g-din Obuća i mislim da je uvaženi kolega Imamović to dobro rekao. Mi smo na Klubu razmatrali Deklaraciju i uzet ćemo učešće do naredne sjednice Skupštine zajedno sa Kolegijem preko naših predstavnika da ova Deklaracija bude što bolja. Naravno, tu treba još neke stvari doraditi i zato podržavam prijedlog g-dina Imamovića da to za narednu sjednicu Skupštine odradi Kolegij u što je moguće boljoj varijanti tako da na sjednici imamo samo izjašnjavaње.

Smatram da olahko donosimo deklaracije, smatram da Deklaracija, ipak, ima svoju težinu, zato Deklaracija koju je predložio g-din Obuća mislim da treba da bude Zaključak. Zaključak ima svoju težinu i znamo šta je cilj i nećemo pogriješiti ako danas donesemo Zaključak. Ipak, danas donijeti Deklaraciju mislim da možemo pogriješiti. Ja podržavam prijedlog g-dina Imamovića da slijedeći put donesemo Deklaraciju, a danas da bude Zaključak.

**Imamović Ibrahim** – Dugujem jedno pojašnjenje. Dio obrazloženja poslanika Bajra Obuće nije taj. Ovdje proizilazi da mi nekoga nešto molimo. Mi ovom Deklaracijom ravnopravnosti kantona, vraćamo Kanton u jednu ustavnu kategoriju. Stalno se nama ponavlja da je Bosansko-podrinjski kanton neodrživ. Ne može društveno-politička zajednica biti neodrživa. Neodrživ je sistem finansiranja. Sistem finansiranja i odluke o finansiranju donese se na višim nivoima vlasti. Viši nivoi vlasti u raspodjeli tih sredstava trebaju da vode računa da svi dobiju isto novca nužno za finansiranje svojih potreba i nemoguće je da Bosansko-podrinjskom kantonu Goražde u tome fale neke pare. Bosansko-podrinjski kanton Goražde, kao Država, on je propustio neke svoje izvorne nadležnosti Federaciji i Državi i Federacija i Država treba da vrate to. Da mi odlučujemo mi ne bi bili u deficitu. Mi bi povećali naše prihode o kojima odlučujemo. Da li bi oni bili preveliki ne znam i napravili bi okvir. Vrlo bitno je da razumijemo šta je težina ove Deklaracije. Problem Federacije BiH je jedan veliki problem. Ona je po mnogim političarima privremena tvorevina. Pošto je privremena tvorevina mi u Federaciji BiH uopšte ne uređujemo neke odnose koji su ranije uspostavljeni. Ko je žrtva tih odnosa? Žrtva tih odnosa su najmanje najslabiji kantoni. Kada smo mi ratovali napravljena je jedna preraspodjela i ja se apsolutno slažem da ovo neće ići lahko. Onaj koji je stavio tamo da ima najviše para ne možeš mu ih uzeti nikako, a to su Sarajevo, Tuzla i ostali. Mi se moramo principijelno, kao građani sa ovog Kantona, da opredjelimo da prekinemo tu priču da smo mi neodrživi i da nekoga molimo. Mi smo održivi, ali je sistem raspodjele na višim nivoima napravio nas neodrživim i osakatio nas je. Ne smije nas Država sakatiti. To je pojašnjenje za sve ljude kako treba da vidimo ove stvari, a da nekoga molimo. Mi ne molimo nikoga, već samo tražimo ono što nam treba da pripada. Ako mi vratimo sebi određene nadležnosti mi ćemo napraviti okvir i bit ćemo održivi i nećemo morati da molimo nekoga da nam pošalje koji dinar. Tražimo ono što pripada ovom Kantonu bez obzira koja je politička opcija ovdje, a koja gore. Po Zakonu o platama kojeg je pripremila Federacija Bosansko-podrinjskom kantonu Goražde fali 8 miliona KM. To je nepravda u raspodjeli koja ne valja. Da mi odlučujemo sami o sebi mi bi imali tih 8 miliona KM. To je meni principijelno suštinsko pitanje. Kanton je Država, ima sve odlike Države, a problem je Federacije što je ona nesavršena i to trebamo uređivati.

Jedan dio Deklaracije govori da jedan ministar iz Bosansko-podrinjskog kantona Goražde mora biti u Federalnoj vladi. Zašto? U Federaciji postoje dva doma. Jedan je Dom građana, a drugi je kanton, gdje kantoni ravnopravno uređuju svoje odnose. Pošto mi ne znamo da li je to Federacija naroda ili kantona, zvanično je Federacija kantona, a Dom naroda je drugi dom. Ne postoji niti jedno tijelo gdje će deset kantona ravnopravno odlučivati o bilo čemu. Mi tražimo sada da bar Vladi budemo



predstavljani sa jednim ministrom gdje bi mogli biti adekvatno predstavljani bez obzira koja će to biti politička partija. To su neke suštinske stvari koje tretira ova Deklaracija. Slažem se da Deklaraciji treba dati značaj, treba joj dati snagu, a ovo je sve u okviru te Deklaracije. Skupština treba da donese Zaključak da se zalažemo i da tražimo od predstavnika svih političkih partija da se borimo sa našim poslanicima gore da podrže Bosansko-podrinjski kanton Goražde, kada se radi o vojsci da nam popravlja puteve i o bilo kojoj drugoj inicijativi koja je na dobrobit ovih građana. Skupština Kantona daje punu podršku bilo od koga da dolazi.

**Terović Dževad** – Ja sam mislio da ovu inicijativu pokrenem kada se bude razgovaralo o Izvještaju o izvršenju Budžeta za 2009. godinu, a obzirom da smo to odgodili za mjesec dana, a čini mi se da bi odmah trebali krenuti u određene aktivnosti jer je završena školska godina. Iz dopune Izvještaja, kojeg smo dobili jutros, vidimo da je 398.000 KM iz Budžeta isplaćeno na ime povremenih i privremenih poslova budžetskim korisnicima za 2009. godinu i da se većina ovih sredstava odnosi na obrazovanje. Kada pitamo zašto je u toj oblasti toliko, blizu 400.000 KM dobijemo odgovor da nemamo dovoljno kadrova za određene nastavne predmete matematika, engleski jezik itd. Ja sam želio da pokrenem slijedeću:

### **Poslaničku inicijativu**

Da se zaduži Ministarstvo za obrazovanje, nauku, kulturu i sport Bosansko-podrinjskog kantona Goražde da definiše tačno za osnovno i srednje obrazovanje koji su to kadrovi koji nam fale, koji je to broj i da u saradnji sa srednjim školama dogovorimo poseban sistem finansiranja studiranja za ove nastavne predmete. Samo u jednoj školskoj godini preko 300.000 KM je dato u ovoj oblasti. Mi sigurno možemo naći nadarene učenike, znati njihov broj i uputiti ih sa posebnim odlukama Skupštine, Vlade, Ministarstva, nije bitno, sa obavezom kada završe fakultete da se vrate u Goražde i da određeni period rade. Time bi izbjegli da nam nastavu izvode ljudi koji nisu profesionalno stručni, dobili bi bolje kadrove i dalja produkcija kadrova iz te oblasti na bazi kvalitetnijeg rada bi imala svoj rezultat.

Zato predlažem da Skupština donese Zaključak kojim obavezuje Ministarstvo za obrazovanje, nauku, kulturu i sport Bosansko-podrinjskog kantona Goražde da na ovu temu za slijedeću sjednicu Skupštine pripremi prijedlog i mišljenje kako bi Ministarstvo Vladi, a Vlada Skupštini mogla dati zeleno svjetlo da idemo u jedan takav projekat, jedno takvo finansiranje i dugoročno riješimo ovaj značajan problem.

**Pleh Muhidin** – ministar za finansije u Vladi Bosansko-podrinjskog kantona Goražde

Samo da se podsjetimo što se tiče dileme gospodina Kumra. Zakon o dugu i zaduživanja po garancijama u Federaciji Bosne i Hercegovine je definisao da se donosi Odluka o zaduženju. Medjutim, po provedenoj proceduri, znači, kada se provede procedura konkretno kada je riječ o drugoj fazi opremanja Kantonalne bolnice Goražde, konačni izvještaji budu o tome i taj se Izvještaj dostavlja Skupštini i Skupština je ta koja daje posljednju riječ, odnosno reguliše se zaduženje. Radi vaše informacije, a na osnovu informacija koje ima Ministarstvo za finansije od strane nadležnog Ministarstva postupak odabira ponudjača je za sada poništen tako da, vjerovatno, će se ponovo ići u te aktivnosti, što će reći shodno Zakonu o dugu i zaduživanju i garancijama u Federaciji Bosne i Hercegovine, a posljednju riječ daje Skupština kada je u pitanju precizno definisanje zaduženja.

**Uruči Nazif** – premijer Bosansko-podrinjskog kantona Goražde

Dr. Frašto Emir je postavio pitanje oko naplate sredstava GIRO „Drina“, radi se o isplati dionica i upravo zbog onoga što smo imali ovdje na Skupštini ta aktivnost prenosi se na Pravobranilaštvo i u toku su aktivnosti između Agencije za privatizaciju Bosansko-podrinjskog kantona Goražde i Pravobranilaštva oko ovoga i očekivati je da ćemo do naredne sjednice Skupštine imati informaciju o tome koliko sredstava, po kom kom zakonskom osnovu je dodjeljeno.

Danas imamo dvije inicijative da Tužilaštvo Bosansko-podrinjskog kantona Goražde, odnosno tužilaštva u Bosni i Hercegovini treba da daju odgovore dokle se došlo sa istragama za

počinjene zločine i da se o tome ova Skupština izjasni. Mislim da bi trebalo i danas, možda, ne znam kako je Poslovníkom predviđeno, je li moguće i ako je moguće mislim da bi to trebalo i danas da se odredimo. Drago mi je da znam da je inicijativa građana došla do poslanice Envere Džemidžić, a bio sam sudionik godišnjice stradanja kada su ljudi to pitali, rekli su da je upućeno Skupštini. Dobro je da je inicijativa stigla i da se o njoj možemo izjašnjavati obzirom da je g-din Borović isto to spominjao za Općinu Ustikolina i mislim da bi u oba slučaja trebalo Tužilaštvo ili tužilaštva da daju što je moguće prije te odgovore.

Moram odgovoriti na pitanje vezano za volontere poslaniku Adžem Memsuru. U ovoj godini je planirano, sa raspoloživim sredstvima u Budžetu Vlade Bosansko-podrinjskog kantona Goražde angažovanje volontera kao i u prošloj godini, a i Služba za zapošljavanje je planirala određene aktivnosti u zapošljavanju volontera i pripravnika i prema informacijama koje smo zajedno radili sa Službom za zapošljavanje trebalo bi praktično svi sa VII stepenom u Bosansko-podrinjskom kantonu Goražde da budu obuhvaćeni ovim programom. Obzirom da je nivo sredstava Vlade 21, na bazi toga su se tražili oni koji su raspoloženi da volontiraju kod Vlade Bosansko-podrinjskog kantona Goražde i tako je napravljen spisak. Očekivati je da ćemo do kraja idućeg mjeseca imati i šansu za sve one druge koji su pripravnici ili volonteri putem Službe za zapošljavanje, tako da oni koji su na dan 31. 05. 2010. godine na evidenciji Službe za zapošljavanje sa VII stepenom moći imati priliku da stažiraju.

Vezano za visoko školstvo u Bosansko-podrinjskom kantonu Goražde nikada nismo razmišljali, a kamoli nekada raspravljali o tome da postojeća odjeljenja fakulteta zatvorimo ili predložimo taj prekid. Bila je inicijativa od Mašinskog fakulteta iz Mostara da se otvori odjeljenje za Mašinski fakultet. Poslije sprovedene ankete prijavilo se samo 17 učenika, budućih studenata koji bi mogli pohađati taj studij i to se pokazalo Mašinskom fakultetu iz Mostara nerentabilnim, tako da za sada nemamo drugih aktivnosti, a podsjetit ću da zahvaljujući inicijativama poslanika u ovoj Skupštini doći će sasvim sigurno do promjene programa u srednjim školama, tako da se nadamo da bi se već od iduće godine moglo se desiti da Mašinski fakultet iz Sarajeva i Mostara ili neki drugi moći će otvoriti i odjeljenje u BPK-a Goražde.

Bila je inicijativa oko toga da je april mjesec čistoće u Kantonu. To, uglavnom, u praksi rade općine. One unutar komunalne službe imaju komunalne inspektore kao i kad su u pitanju psi lualice. Upravo je neki dan potvrđeno da je isključiva nadležnost brige o tome na lokalnim zajednicama, što ne znači da u saradnji između vladinog i nevladinog sektora općina unutar Kantona ne može se napraviti program ukoliko nedostaju sredstva i može se pomoći, ali ne bi bilo dobro da mješamo nadležnosti, a u realizaciji projekata učestvovali smo i do sada.

Bilo je pitanje dokle se došlo sa prodajom stanova? Mi još nismo završili posao sa Općinom Goražde, jer nismo dobili ni upotrebnu dozvolu i ako smo to poodavno platili. Od petka imam čvrsto obećanje načelnika Općine Goražde da će u ovoj sedmici održati se taj sastanak i nadam se da ćemo tada razrješiti ovo pitanje, u protivnom, morat ćemo posegnuti za nekim sredstvima koja nisu popularna, ali ako su neophodna morat ćemo to praviti.

Poslanik Turčalo Mehmed je spomenuo da ima studenata koji nisu dobili posao u Bosansko-podrinjskom kantonu Goražde. Nažalost, mnogo ih je. S jedne strane nije bilo svršenih studenata pa onda su počeli dolaziti, pa sada imamo drugi problem da ne mogu naći radna mjesta, ali su se neki odvažili da idu na postdiplomski studij. Postoje kriteriji koje je Vlada usvojila i po tim kriterijima svima, ne samo onima koji su zaposleni, pružena nejednaka šansa kada je u pitanju postdiplomski studij i mislim da bi po tim pravilima trebali svi da imaju jednaka, i imaju u po tim pravilima, utvrđena jednaka prava. Da li treba tu nešto mijenjati? Morat će to neko predložiti šta bi to moglo i koliko treba novca. To ćemo morati sagledati.

Da se osvrnem na stav Vlade na Rezoluciju koju je pokrenula Skupština i na inicijativu koja je danas pokrenuta ovdje u samoj Skupštini oko Zakona o izmjenama i dopunama Zakona o pripadnosti javnih prihoda u Federaciji Bosne i Hercegovine. Mislim da bi to, na fonu o čemu su

govorili poslanici Obuća i Imamović i drugi koji su dali svoj doprinos, pojačava stav Bosansko-podrinjskog kantona Goražde pozicije u Federaciji i sa tog aspekta u interesu je svih da to podržimo.

Vežano za lokalne puteve i angažovanje Oružanih snaga moram kazati, prilikom kontakata koji su bili još krajem protekle godine kod budžetiranja Bosansko-podrinjskog kantona Goražde i otpusta vojnika koji se dešava u 2010. godini sa ministrom Cikotićem, pored ostalog, tražili smo kako je moguće dobiti pomoć iz Oružanih snaga BiH. Između ostalog, je spominjano i to da će se tražiti rješenje kod otpusta vojnika, a s druge strane da se može i oprema, odnosno mehanizacija koju posjeduju Oružane snage BiH staviti u funkciju za dobrobit građana i tada je ministar obećao da će ovu temu razmotriti i da će kontaktirati sa kantonima i općinama i nadam se da će riječ održati i da će se to desiti u Bosansko-podrinjskom kantonu Goražde.

Što se tiče Mljekare, poslanici na sjednicu su kazali, da odluke i stavovi Komisije koja je zadužena nisu još završeni. Prema tome, nije moguće očekivati da Vlada Bosansko-podrinjskog kantona Goražde ima dalje korake preduzete u tom pogledu. Jedino, nisam provjerio, ali ću iznijeti ono što je do mene došlo, jeste da su radnici pokrenuli stečaj u Mljekari. Ako je to tačno onda je pokrenut stečaj od povjerenika u privatnoj firmi i onda ćemo imati sudski epilog, ali kad to provjerimo moći ćemo nastaviti dalje.

**Kumro Mesud** – U vezi s ovim što je premijer rekao, a odnosilo se na moju poslaničku inicijativu oko proglašenja mjeseca čistoće u ovom Kantonu, mislim da nije bilo potrebno da me premijer poučava u smislu da su lokalne zajednice, odnosno opštine zadužene za održavanje čistoće u gradovima. Ja to vrlo dobro znam. Međutim, premijeru izgleda nije poznato ili neće da mu bude poznato da u istoj mjeri i nadležno Ministarstvo za urbanizam i okoliš, kao i Ministarstvo za obrazovanje su trebali, po meni, formirati neko koordinaciono tijelo sa predstavnicima opština načelnicima, pomoćnicima načelnika nadležnih službi za komunalne djelatnosti, direktorima škola, predsjednicima mjesnih zajednica i osmisliti plan, program provođenja mjera na čišćenju i uređivanju prostora ovog Kantona. Isto tako, bilo je lijepo, da možda i premijer učestvuje u svemu tome. Prvi dan da se obrati građanima, omladini, djeci, djacima i da se počne sa tim aktivnostima.

**Uruči Nazif** – premijer Bosansko-podrinjskog kantona Goražde

Što se tiče Kantona različite institucije su već učestvovala, polazeći od škola itd. i mislim da je suviše to ovdje spominjati. Ja govorim o elementarnim ingerencijama jednog i drugog nivoa vlasti ali, nažalost, u ovoj Državi ih ima puno. Što se tiče ovoga da li bi ja učestvovao? Ja nemam namjeru da dolazim i da se obraćam. Kada se bude organizovala akcija neko treba da pozove premijera i ja ću vrlo rado doći i raditi ono što oni koji organizuju daju meni u zadatak.

**Begović Alija** – predsjedavajući Skupštine

Na klupe smo dobili Deklaraciju koje je u ime Kluba poslanika Stranke demokratske akcije predložio g-din Bajro Obuća. Prilično je kratka i mi smo planirali da se na kraju sjednice izjasnimo. Međutim, da je sadržaj kratak i da nema ništa sporno koliko ja vidim iz bilo čije perspektive.

Pozivam sve one koji žele popraviti tekst Deklaracije da uzmu učešća.

**Bilić Dragomir** – Ja sam ranije imao inicijativu da ova tačka Vladin sat – poslanička pitanja i inicijative se razmatra na kraju dnevnog reda.

**Begović Alija** – predsjedavajući Skupštine

O predloženoj Deklaraciji izjasnit ćemo se na kraju sjednice. Dajem priliku svim poslanicima da, ako žele, poprave tekst predložene Deklaracije. Ima prijedloga da to bude Zaključak, a ne Deklaracija.

**Obuća Bajro** – Već smo dobili, na određen način, nekih korisnih primjedbi, sugestija, prijedloga itd. Prva se odnosi da ne bude Deklaracija da bude Zaključak. To možemo prihvatiti da bude Zaključak. Automatski u preambuli bi umjesto člana 110. trebalo upisati član 109. Vezano za drugi stav, mislim da je prihvatljivo da ga brišemo, jer smo već u prvom stavu Deklaracije rekli da to očekujemo od Parlamenta Federacije, a Parlament Federacije uključuje i poslanike sa našeg područja, kao i prvi stav obrazloženja.

Praktično izmijenjen ovaj tekst bi bio da se u preambuli umjesto člana 110. upiše član 109., umjesto Deklaracije da bude Zaključak koji bi imao samo prvi stav, drugi bi se brisao, a u obrazloženju bi se brisao prvi stav. Mi, kao predlagači, prihvatimo sve primjedbe i Skupština se može izjasniti o ovom Zaključku. Također prihvatamo da se u obrazloženju u stavu 1. iza riječi „osnovu“ upišu riječi: „projekcija i pokazatelj“.

**Žuga Damir** – U ime Kluba poslanika Stranke za Bosnu i Hercegovinu moram da kažem da je još prije godinu dana jedan poslanik pokrenuo inicijativu o izmjeni ovog Zakona. Mislim da bi se malo više trebale pratiti te stvari i da smo ranije to uradili već danas bi možda imali plod. Dakle, potrebno je doraditi Deklaraciju g-din Imamovića za slijedeću sjednicu Skupštine i mi ćemo je podržati i uzet ćemo aktivno učešće na doradi te Deklaracije. Podržat ćemo i ovaj Zaključak kojim se daje podrška za izmjenu Zakona o izmjenama i dopunama Zakona o pripadnosti javnih prihoda u Federaciji Bosne i Hercegovine. Ali moram da kažem neke stvari što vi kroz ove zaključke i deklaracije krijete svoj nerad gospodo. Kriva vam sve Federacija. Ne da pare. Imali tu igdje vašeg angažmana rada ili možda nerada? Dakle, pitam da li vas možda grize savjest za to što ova Vlada i koalicija nije uspjela da obezbijedi grant prošle godine a ne zna hoće li i ove godine, pa se krijete iza Deklaracije, zaključaka itd. Ali rekao sam da ćemo podržati Deklaraciju i Zaključak, ali, molim vas nemojte se kriti iza Deklaracije i Zaključka kao da to odmah neke stvari mijenja.

**Begović Alija** – predsjedavajući Skupštine

G-dine Obuća možemo li prihvatiti da se u obrazloženju u stavu 1. iza riječi „osnovu“ upišu riječi: „projekcija i pokazatelj“? Možemo! Hvala!

Stavljam na glasanje prijedlog teksta Zaključka koji je predložio Klub poslanika Stranke demokratske akcije.

Ko je za, molim, da dignu ruku? /24 poslanika/

Ima li neko protiv? /Niko/

Da li se neko uzdržao od glasanja? /Niko/

Konstatiram da je Skupština Bosansko-podrinjskog kantona Goražde, jednoglasno, sa 24 glasa „za“ prihvatila slijedeći tekst:

Na osnovu člana 109. Poslovnika Skupštine Bosansko-podrinjskog kantona Goražde /“Službene novine Bosansko-podrinjskog kantona Goražde“, broj: 10/08/, Skupština Bosansko-podrinjskog kantona Goražde, na 36-toj redovnoj sjednici održanoj 31. maja 2010. godine, donijela je slijedeći:

### **Z a k l j u č a k**

Skupština Bosansko-podrinjskog kantona Goražde daje punu podršku i poziva Parlament Federacije Bosne i Hercegovine da usvoji Prijedlog Zakona o izmjenama i dopunama Zakona o pripadnosti javnih prihoda u Federaciji Bosne i Hercegovine koji je upućen u parlamentarnu proceduru 10. maja 2010. godine.

## **O b r a z l o ž e n j e**

Na osnovu projekcija i pokazatelja za 2010. godinu, ponudjenim prijedlogom, odnosno koeficijentom od 1,27% obezbjedila bi se dodatna sredstva na godišnjem nivou od cca 28 miliona KM i izvršila proporcionalna raspodjela na ekonomski neodržive kantone.

Bosansko-podrinjskom kantonu Goražde potrebno je obezbijediti najmanje dodatnih 16,8 miliona KM godišnje ili 60% od ubranih sredstava radi pokrivanja budžetskog deficita.

Ovim prijedlogom izmjena i dopuna Zakona prihodi koji pripadaju kantonima vraćaju se na nivo od 51,48%, dok se koeficijent pripadnosti prihoda Federacije Bosne i Hercegovine, takodje, vraća na nivo 36,20% kako je to bilo utvrđeno prije izmjena i dopuna Zakona o pripadnosti javnih prihoda u Federaciji Bosne i Hercegovine /“Službene novine Federacije Bosne i Hercegovine“, broj: 43/08/.

**Begović Alija** – predsjedavajući Skupštine

Pozivam sve one na koje se odnose poslanička pitanja i inicijative da u pisanoj formi dostave odgovore, do naredne sjednice Skupštine. Takodjer, pozivam sve poslanike koji su postavili poslanička pitanja i inicijative, a nisu ih dostavili u pisanoj formi, dostave u pisanoj formi osobito ona pitanja koja se odnose na tužilaštva, a bilo je takvih dosta. Dakle, potrebno nam je postavljeno pismeno pitanje kako bi ga prosljedili na nadležne adrese.

### **Tačka 2.-**

Prelazimo na 2-gu tačku dnevnog reda: Nacrt Zakona o izmjenama i dopunama Zakona o zaštiti okoline Bosansko-podrinjskog kantona Goražde.

Obrazloženje po Nacrtu Zakona o izmjenama i dopunama Zakona o zaštiti okoline Bosansko-podrinjskog kantona Goražde dao je predstavnik Minsitarstva za urbanizam, prostorno uređenje i zaštitu okoline u Vladi Bosansko-podrinjskog kantona Goražde Šunja Ahmed.

**Bašić Redžo** – predsjednik Komisije za urbanizam, prostorno uređenje, stambeno-komunalnu politiku, infrastrukturu i zaštitu okoline

Komisija za urbanizam, prostorno uređenje, stambeno-komunalnu politiku, infrastrukturu i zaštitu okoline Skupštine Bosansko-podrinjskog kantona Goražde imala je stav da se Nacrt Zakona o izmjenama i dopunama Zakona o zaštiti okoline Bosansko-podrinjskog kantona Goražde povuče sa dnevnog reda 36-te redovne sjednice Skupštine Bosansko-podrinjskog kantona Goražde, a da se skрати rok za javnu raspravu.

Medjutim, kako je započeta ova procedura mi smo odustali od svog stava i zato nismo kod diskusije po dnevnom redu ni insistirali na ovom pitanju.

Imamo primjedbu na član 7. gdje se kaže: „Privredna društva mogu izraditi programe zaštite okoline na dobrovoljnoj osnovi“. Obzirom da je dobrovoljni rad davno umro u Bosni i Hercegovini, nažalost, predlažemo da se ovaj stav izbriše. „Privredna društva su dužna da izrade planove zaštite okoline ukoliko je to propisano posebnim zakonom“. Definisati kojim, a ako nije naglašeno kojim ovaj stav kompletno brisati. Član 33. „Ovlašćuje se Ustavna i zakonodavno-pravna komisija Skupštine Bosansko-podrinjskog kantona Goražde da utvrdi prečišćeni tekst Zakona o zaštiti okoline“. Predlažemo da se ovaj član briše, a da kasnije bude zaključak nakon usvajanja Prijedloga Zakona.

U ime Komisije predlažem da rok za javnu raspravu bude do 60 dana.

**Obuća Bajro** – Klub poslanika Stranke demokratske akcije i ja lično kao član Komisije za urbanizam, prostorno uređenje, stambeno-komunalnu politiku, infrastrukturu i zaštitu okoline, podržavam sve ovo što je g-din Bašić rekao u cjelosti. Obzirom da je Nacrt Zakona trebamo se dogovoriti koji je to period za javnu raspravu, mislim da je dobro što je rečeno do 60 dana i da onda u detaljima, ako ima još nekih primjedbi, pored već izrečenih to popravimo kroz javnu raspravu i kasnije kod utvrđivanja Prijedloga Zakona.

**Begović Alija** – predsjedavajući Skupštine

Pošto se niko više ne javlja za riječ, zaključujem raspravu po Nacrtu Zakona o izmjenama i dopunama Zakona o zaštiti okoline Bosansko-podrinjskog kantona Goražde i predlažem da donesemo **sljedeći zaključak**:

1/ Utvrđuje se Nacrt Zakona o izmjenama i dopunama Zakona o zaštiti okoline Bosansko-podrinjskog kantona Goražde i upućuje na javnu raspravu.

2/ Javnu raspravu će sprovesti: Ministarstvo za urbanizam, prostorno uređenje i zaštitu okoline, Ustavna i zakonodavno-pravna komisija Skupštine Bosansko-podrinjskog kantona Goražde, Komisija za urbanizam, prostorno uređenje, stambeno-komunalnu politiku, infrastrukturu i zaštitu okoline.

3/ Javnu raspravu sprovesti sa svim zainteresovanim institucijama u sve tri općine u sastavu Bosansko-podrinjskog kantona Goražde.

4/ Rok za sprovođenje javne rasprave je do 60 dana.

Ko je za ovakav zaključak, molim, da digne ruku? /24 poslanika/

Ima li neko protiv? /Niko/

Da li se neko uzdržao od glasanja? /Niko/

Konstatiram da je Skupština Bosansko-podrinjskog kantona Goražde, jednoglasno, sa 24 glasa „za“ donijela sljedeći:

### **Z a k l j u č a k**

1/ Utvrđuje se Nacrt Zakona o izmjenama i dopunama Zakona o zaštiti okoline Bosansko-podrinjskog kantona Goražde i upućuje na javnu raspravu.

2/ Javnu raspravu će sprovesti: Ministarstvo za urbanizam, prostorno uređenje i zaštitu okoline, Ustavna i zakonodavno-pravna komisija Skupštine Bosansko-podrinjskog kantona Goražde, Komisija za urbanizam, prostorno uređenje, stambeno-komunalnu politiku, infrastrukturu i zaštitu okoline.

3/ Javnu raspravu sprovesti sa svim zainteresovanim institucijama u sve tri općine u sastavu Bosansko-podrinjskog kantona Goražde.

4/ Rok za sprovođenje javne rasprave je do 60 dana.

### **Tačka 3.-**

Prelazimo na 3-ću tačku dnevnog reda: Nacrt Zakona o unutrašnjim poslovima Bosansko-podrinjskog kantona Goražde.

/Sjednici Skupštine prisustvuje ispred OHR-a Sarajevo gosp. Senad Zlatar/.

Obrazloženje po Nacrtu Zakona o unutrašnjim poslovima Bosansko-podrinjskog kantona Goražde dao je ministar unutrašnjih poslova Sipović Nusret, a u diskusiji je učestvovao Imamović Ibrahim.

/Sjednici prisustvuje 21 poslanik/

Pošto se niko više ne javlja za riječ, zaključujem raspravu po Nacrtu Zakona o unutrašnjim poslovima Bosansko-podrinjskog kantona Goražde i predlažem da usvojimo **sljedeći zaključak**:

1/ Utvrđuje se Nacrt Zakona o unutrašnjim poslovima Bosansko-podrinjskog kantona Goražde i upućuje na javnu raspravu.

2/ Javnu raspravu će sprovesti: Ministarstvo unutrašnjih poslova Skupštine Bosansko-podrinjskog kantona Goražde, Ustavna i zakonodavno-pravna komisija Skupštine Bosansko-podrinjskog kantona Goražde i Komisija za bezbjednost, nadzor nad radom policije, borbu protiv korupcije i pitanja iz nadležnosti inspeksijskih organa.

3/ Javnu raspravu sprovesti sa svim zainteresovanim institucijama u sve tri općine u sastavu Bosansko-podrinjskog kantona Goražde.

4/ Rok za sprovođenje javne rasprave je do 30 dana.

Ko je za, molim, da digne ruku? /21 poslanik/

Ima li neko protiv? /Niko/

Da li se neko uzdržao od glasanja? /Niko/

Konstatiram da je Skupština Bosansko-podrinjskog kantona Goražde, jednoglasno, sa 21 glasom „za“ donijela sljedeći:

### **Z a k l j u č a k**

1/ Utvrđuje se Nacrt Zakona o unutrašnjim poslovima Bosansko-podrinjskog kantona Goražde i upućuje na javnu raspravu.

2/ Javnu raspravu će sprovesti: Ministarstvo unutrašnjih poslova Skupštine Bosansko-podrinjskog kantona Goražde, Ustavna i zakonodavno-pravna komisija Skupštine Bosansko-podrinjskog kantona Goražde i Komisija za bezbjednost, nadzor nad radom policije, borbu protiv korupcije i pitanja iz nadležnosti inspeksijskih organa.

3/ Javnu raspravu sprovesti sa svim zainteresovanim institucijama u sve tri općine u sastavu Bosansko-podrinjskog kantona Goražde.

4/ Rok za sprovođenje javne rasprave je do 30 dana.

### **Tačka 4.-**

Prelazimo na 4-tu tačku dnevnog reda: Prijedlog Odluke o utvrđivanju prava na zdravstveno osiguranje radnika koji to pravo ne ostvaruju po drugom osnovu za 2010. godinu.

**Begović Alija** – predsjednik Ustavne i zakonodavno-pravne komisije

Ustavna i zakonodavno-pravna komisija Skupštine Bosansko-podrinjskog kantona Goražde, na sjednici održanoj 24. maja 2010. godine razmatrala je Prijedlog Odluke o utvrđivanju prava na zdravstveno osiguranje radnika koji to pravo ne ostvaruju po drugom osnovu za 2010. godinu, pa je na osnovu člana 23. i člana 36. Poslovnika Skupštine Bosansko-podrinjskog kantona Goražde /Službene novine Bosansko-podrinjskog kantona Goražde”, broj: 10/08/, zauzela **sljedeći**:

## S t a v

Predlaže se predlažaču Odluke o utvrđivanju prava na zdravstveno osiguranje radnika koji to pravo ne ostavuju po drugom osnovu za 2010. godinu da promjeni preambulu Odluke koja će glasiti: "Na osnovu člana 17. stav 1. tačka b/ i Poglavlja IV Odjeljak A člana 23. Ustava Bosansko-podrinjskog kantona Goražde /"Službene novine Bosansko-podrinjskog kantona Goražde", broj: 8/98, 10/00 i 5/03/, člana 106. i 108. Poslovnika Skupštine Bosansko-podrinjskog kantona Goražde /"Službene novine Bosansko-podrinjskog kantona Goražde", broj: 10/08/, Skupština Bosansko-podrinjskog kantona Goražde na svojoj 36-toj redovnoj sjednici održanoj 31. maja 2010. godine, **d o n o s i:**"

Ministar je prihvatio ovaj prijedlog.

Da li se još neko javlja za riječ?

Pošto se niko više ne javlja za diskusiju, zaključujem raspravu po Prijedlogu Odluke o utvrđivanju prava na zdravstveno osiguranje radnika koji to pravo ne ostvaruju po drugom osnovu za 2010. godinu i pozivam poslanike da se izjasnimo dizanjem ruke.

Ko je za, molim, da digne ruku? /21 poslanik/

Ima li neko protiv? /Niko/

Da li se neko uzdržao od glasanja? /Niko/

Konstatujem da je Skupština Bosansko-podrinjskog kantona Goražde, jednoglasno, sa 21 glasom „za“ donijela Odluku o utvrđivanju prava na zdravstveno osiguranje radnika koji to pravo ne ostvaruju po drugom osnovu za 2010. godinu.

### Tačka 5.-

Prelazimo na 5-tu tačku dnevnog reda: Informacija o radu Nezavisnog odbora za izbor i reviziju policijskog komesara Ministarstva unutrašnjih poslova Bosansko-podrinjskog kantona Goražde za period 01. 01. – 31. 12. 2009. godine.

**Begović Alija** – predsjedavajući Skupštine

Otvaram raspravu po ovoj tački dnevnog reda.

Pošto se niko ne javlja za riječ, zaključujem raspravu i konstatiram da je Skupština Bosansko-podrinjskog kantona Goražde primila k znanju Informaciju o radu Nezavisnog odbora za izbor i reviziju policijskog komesara Ministarstva unutrašnjih poslova Bosansko-podrinjskog kantona Goražde za period 01. 01. – 31. 12. 2009. godine.

### Tačka 6.-

Prelazimo na 6-tu tačku dnevnog reda: Informacija o aktivnostima na izgradnji obilaznice oko Goražda.

**Begović Alija** – predsjedavajući Skupštine

Otvaram raspravu po ovoj tački dnevnog reda.

U diskusiji, po Informaciji o aktivnostima na izgradnji obilaznice oko Goražde, učestvovali su: Bašić Redžo, Kurtović Mustafa ministar za privredu BPK-a Goražde, Turčalo Mehmed i Kumro Mesud.



**Begović Alija** – predsjedavajući Skupštine

Pošto se niko više ne javlja za riječ, zaključujem raspravu i konstatiram da je Skupština Bosansko-podrinjskog kantona Goražde primila k znanju Informaciju o aktivnostima na izgradnji obilaznice oko Goražda.

#### **Tačka 7.-**

Prelazimo na 7-mu tačku dnevnog reda: Informacija o zimskom i ljetnom održavanju puteva na području Bosansko-podrinjskog kantona Goražde.

**Begović Alija** – predsjedavajući Skupštine

Otvaram raspravu po ovoj tački dnevnog reda.

**Bašić Redžo** – Ispred Kluba poslanika Socijaldemokratske partije Bosne i Hercegovine predlažem da se za zimsko održavanje puteva izdvoji 40%, a za ljetno održavanje puteva 60% jer je to ono trajno što ostaje na putu.

Dalje, u diskusiji po Informaciji o zimskom i ljetnom održavanju puteva na području Bosansko-podrinjskog kantona Goražde učestvovao je Kumro Mesud i podržao prijedlog poslanika Bašić Redža i predložio da se donese strategija i odrede prioriteti izgradnje puteva.

Pošto se niko više ne javlja za riječ, zaključujem raspravu i konstatiram da je Skupština Bosansko-podrinjskog kantona Goražde primila k znanju Informaciju o zimskom i ljetnom održavanju puteva na području Bosansko-podrinjskog kantona Goražde.

#### **Tačka 8.-**

Prelazimo na 8-mu tačku dnevnog reda: Informacija o provedenim aktivnostima na izgradnji, održavanju, sanaciji i rekonstrukciji regionalnih cesta i mostova na području Bosansko-podrinjskog kantona Goražde.

**Begović Alija** – predsjedavajući Skupštine

Otvaram raspravu po ovoj tački dnevnog reda.

U diskusiji, po ovoj tački dnevnog reda, učestvovali su: Bašić Redžo, Žuga Damir, Kurtović Mustafa ministar za privredu BPK-a Goražde, Đozo Hasan, Obuća Bajro, Ferhatović Jasmin, Begović Alija, Adžem Memsur, Imamović Ibrahim i Borović Mensud.

Pošto se niko više ne javlja za riječ, zaključujem raspravu i konstatiram da je Skupština Bosansko-podrinjskog kantona Goražde primila k znanju Informaciju o provedenim aktivnostima na izgradnji, održavanju, sanaciji i rekonstrukciji regionalnih cesta i mostova na području Bosansko-podrinjskog kantona Goražde.

Pošto je dnevni red iscrpljen predsjedavajući Skupštine Bosansko-podrinjskog kantona Goražde zaključio je 36-tu redovnu sjednicu u 13:30 sati.

**SEKRETAR SKUPŠTINE**

Bašić Midhat

**PREDSJEDAVALJUĆI SKUPŠTINE**

Begović Alija